

文獻志三

南皮縣志卷九

文獻志三

儒林

張璿	鄭金	劉扶	劉盛	侯楹	刁冲	李鉉	鮑季詳
劉深	張茂華	穆朴	張應	許	黃家棟	柴克	尹天
劉人龍	白汝霖	張奎	張震	吳珂	張慶長	劉	陶
邵壽麟	張用濟	劉有廉	張鉞	朱晉曾	張	仲	陶
李榮春	張光簡	張仲淳	白方祺	尹仲權	張	仲	陶

上古

封鉅炎帝之後生於渤海為黃帝師氏見漢書此渤海之始

其居

名封臺在丈二橋東

按班固古今人物表封鉅為黃帝師無渤海之說故鄭夾深氏族略亦不載三代時及秦三十六郡均無渤海之名渤海郡實起於漢萬姓統譜載封氏出於渤海郡未知何據舊志并儒林之首今仍之

南皮縣志

卷九

文獻志三 儒林

一

漢

趙定渤海人時稱為名儒兼明音律嘗著雅歌及雅琴等書宣

帝時丞相魏相奏聞召見待詔後拜為侍郎

府志入藝術

劉扶劉盛

天津府志漢呂圖傳漢隸書魯峻碑考峻治魯詩兼通顏氏春秋學為儒宗圖其高弟也碑陰門生姓名

有渤海南皮人劉扶劉盛當為儒林知名士故補入之

北齊

刁冲字文朗渤海人楷子十三而孤孝慕過人其祖母司空高

允女哀其早孤撫養周至冲免喪後志學他方高氏泣涕留之

終不止雖家世貴達及從師於外自同諸生於時學制諸生悉

日直監廚冲雖有僕隸不令代已身自炊爨每師授之際發志

精專殆忘寒暑學通諸經編修鄭說陰陽圖緯算數天文風氣

之書莫不關綜當世服其精博刺史郭祚聞其盛名訪以疑義應機解辨無不祛其久惑太守范陽盧上之刺史河東裴桓並徵冲爲功曹主簿非所好也但受署而不關事務惟以講學爲心四方學徒就業者歲有數百冲雖儒生而執性壯烈不畏強禦延昌中帝舅司徒高肇擅恣威權乃抗表極言其事辭旨懇直文義忠憤太傅清河王懌覽而歎息先是冲曾祖靡作行孝論以誠子孫稱古之葬者衣之以薪不封不樹後世聖人易之以棺槨至秦以後生則不能致養死則厚葬過度及於末世遽蔭裹尸俛而葬者確而爲論並非折衷旣知二者之失豈宜同之當今所存者棺槨不過三寸高不過三尺弗用繒綵歛以時服輻車止用白布爲幔不加畫飾名爲清素車又去挽歌方

南皮縣志

卷九

文獻志三 儒林

二

相並明器雜物及冲祖遵將卒飭其子孫令奉靡遺旨河南尹丞張普惠謂爲太儉貽書於冲叔整令與通學議之冲乃致書國學諸儒以論其事學官竟不能答神廡末冲以嫡傳祖爵東安侯京兆王繼爲司空也並以高選頻辟記室參軍明帝將親釋奠於是國子助教韓神固與諸儒詣國子祭酒崔光吏部尚書甄琛舉其才學奏而徵焉及卒國子博士高涼及范陽盧道侃盧景裕等復上狀陳冲學業行義奏諡曰安憲先生祭以太牢子欽字志儒早亡蓋渤海刁氏世多通儒而冲尤其最著者也不但當時名揚天下卽後世之修儒業者亦莫不嘖嘖稱之令德令名至今不朽

李鉉字寶鼎九歲入學書急就篇月餘便通家素貧嘗春秋務

農冬乃入學年十六從浮陽李周仁受毛詩尚書章武劉子猛受禮記常山房虬受周官儀禮漁陽鮮於靈馥受左氏春秋鉉以鄉里無可師者遂與州里楊元懿河間宗惠振等結友詣大儒徐遵明受業居徐門下五年長稱高弟年二十三便自潛居討論是非撰定孝經論語毛詩三禮義疏及三傳異同周易義例合三十餘卷用心精苦曾三秋冬不蓄枕每睡假寐而已年二十七歸養二親因教授鄉里生徒恒數百人燕趙間能言經者多出其門以鄉里寡文籍來遊京師讀所未見書舉秀才除太學博士及李同軌卒齊神武令文襄在京妙簡碩學以教諸子文襄以鉉應旨徵詣晉陽時中山石曜北平陽詢北海王晞清河崔瞻廣平宋欽道及工書人韓毅同在東館師友諸王鉉

南皮縣志

卷九

文獻志三 儒林

三

以去聖久遠文字多乖謬於講授之暇遂覽說文倉雅刪正六藝經注中謬字名曰字辯天保初詔鉉與殿中尚書邢邵中書令魏收等參議禮律仍兼國子博士時詔北平太守宋景業西河太守綦母懷文等草定新歷錄尚書平原王高隆之令鉉與通直常侍房延祐國子博士刁柔參考得失尋正國子博士廢帝之在東宮也宣詔鉉以經入授甚見優禮卒特贈廷尉少卿及還葬王人將送儒者榮之

鮑季詳篤學明禮聽其雜文析句自然大略可解兼通左氏春秋少時爲李寶鼎都講後亦自有徒衆天統中卒於北齊太學博士從弟長暄兼通禮傳爲任城王湝丞相掾恒在京教授貴遊子弟齊亡後歸鄉里講經卒於家

明

張璿少奇穎工詩歌古文詞領成化庚子鄉薦任兩淮運副使致政家居潛心理學構草堂數椽教授生徒發明關閩濂洛之旨嘗言真儒學問終離不得一敬字以故動止必準先正士林互相語曰此今日橫渠先生也由是遠近宗之士風爲之一變子繡玉山主簿忠碭山知縣贈奉直大夫曾孫謚見仕績

鄭金字伯純號龍川研精周易性孤介慎取與謹交遊誨後學以實行爲先年五十成進士令平原內行修潔均徭役禁淫祀奏績列上考遷戶部主事督糧德州政績益著事竣卒於家祀

鄉賢子登瀛世其學贛榆訓導

府志列循吏

穆朴字子實列號淳庵庠生儒官朴學問既優性情尤厚粹然

南皮縣志

卷九

文獻志三 儒林

四

篤行允符乎淳庵之號而不愧儒官之稱有墓誌見金石

侯楹字子本世居南皮因號渤海寡言笑淡泊自適潛心理學三十年剖析同異以存誠主敬爲務一時名士俱從之遊詩格淡遠在韋孟間領萬歷癸卯鄉薦任束鹿教諭與庠士剖疑晰蘊抒平生心得之奧多士欣然嚮學束鹿文運稍屯楹教未歲周卽有登賢書者自此科名始盛遷黔南司理不就歸隱今是亭觴咏其中自號抱甕子年七十五卒鄉謚曰貞靖子煒貢生

清

黃家棟字衛宸性質直不事藻飾食貧嗜古嘗館僧寺扃戶不出淹貫羣書崇禎庚午舉於鄉上春官不第遂絕意仕進潛心理學其發明經旨大闡關閩濂洛之傳遠近負笈者慕焉相嚙

通儒術掇巍科者濟濟焉年七十步履矍鑠猶能燈下作蠅頭楷書好學不倦每語人曰吾生平無他事惟書債未償耳文名寔盛操守端嚴宅心醇粹藝林鄉黨稱其學古有獲得天獨厚順治元年銓選未定命擇德行才望者署縣事衆推家棟任之亦異數也卒後鄉諡曰修道先生著有四書非非集大易約解等書子得焜甲辰進士得煜壬子副榜

柴克振字迴瀾性倜儻治尚書有心得之秘三輔士咸尊禮之以貢生任平鄉訓導與諸生講求實學發傳註所未明轉懷柔教諭代署縣事籌策濟貧士俾無失儒業廟學修治一新擢諸城縣除火耗疏驛遞民有德政謠甫數月因海寇之變註誤左遷吉安府經歷以才猷見知於按院卒年八十四貧無餘資著

南皮縣志

卷九

文獻志三 儒林

五

有書經約旨文章扼要藏於家子堪棟辛丑舉人孫廷望癸丑進士

劉深字海若一字德炎別號瀛墅父鏃早卒母萬氏崇祀節孝祠深自幼讀書得力母教者居多立身以范文正公爲法而爲學宗程朱少補弟子員試輒冠軍由拔貢中順治甲午科舉人乙未科進士分發河南知扶溝縣事多惠政治尚寬平人民愛如父母提倡文學創建書院取聰俊之士課以經史有用之學於時大吏皆雅重其人充丁酉科江南鄉試同考官所得皆知名士合肥李相國天馥其首拔也旋奉欽取行人司行人考授湖廣道監察御史以闡事註誤左遷陝西布政司都是康熙五年丁母憂歸里絕意仕進日以樸學教其子弟無敢染仕宦習

者曾有詩云敢謂藐躬能訓課略憑講肄樂餘年其志趣可以想見卒年七十四著有詩文若干卷後經兵燹佚失子渠歲貢生

張茂華字鄧林明崇禎癸酉舉人卓有志行自清初圈占後恒產無存流離失業從無調飢之歎平生不趨貴要有司重其爲人每折節敬禮恒以病辭篤行嗜學善說禮經嘗讀哀江南賦悵然有感旋病卒

張應譽字伊知歲貢生性端嚴動遵矩矱躬踐實學經明行修教子弟正本清源不屑屑謀進取日注疏手記四書經傳講義著有四書日講集解讀易集解春秋解子金節恩貢生亦以樸學著

南皮縣志

卷九

文獻志三 儒林

六

許齡字南金號比庵雍正癸卯舉人生平學養兼優無愧篤行君子家居教授慨然以名教風化爲己任出其門者多通儒獻縣紀文達公同邑張兼山都轉其最著者也卒祀鄉賢有墓碑見金石

張慶長字穀貽號壽山雍正己卯舉人乾隆乙丑明通授河間教諭辛未成進士任廣東海豐定安高要南海知縣嘗擒劇盜四十餘人擇其尤者置諸法羣盜屏竄又能馴生黎而使之服教總督巡邊黎衆伏道左喃喃稱好縣官尤善治獄雖極疑難者一勘即破人以爲神陸豐有七年未結之案立判之後以親老北歸其爲人精強敏幹而篤於寔行處家庭待親友本所學以樂育英才無不以厚處之粹然至德固不僅以循吏稱也子

端城孫志廉曾孫修育春育玄孫曾敷皆進士曾敷則位至封疆云有墓誌見金石

尹天爵字純仁號自牧天資明敏性情果斷以家貧故十九歲始入塾從師游張先生慶長之門學有根柢二十三補博士弟子員乾隆壬午領鄉薦南宮不捷遂絕意仕宦究心理學晚年學益邃教授有方從遊者一經甄陶便成佳士遠近後學皆宗仰之其表弟吳嶠峰受教最久相得甚深出仕永平臨行時猶以酒醴奠墓前惓惓不忍去

劉人龍字孟班號戢軒乾隆庚辰舉人選授四川納谿縣知縣歷任高縣拱縣均有善政道光元年卒年九十一歲自少性孤峭傲岸不凡讀書則厭棄俗學肆力古文詞更日究訓詁義理

南皮縣志

卷九

文獻志三 儒林

七

不遺餘力及出仕聽訟無積案事關倫常必重節義以維風化創建書院捐貲爲之不用民間一錢告歸授徒講學親族子弟多所成就著有戢軒文集四書講義批選古文
自汝霖字旣霑性高朗器識宏遠幼隨父灤州學正任才名藉藉旋從父歸適以年例出貢遂棄舉子業晚年讀宋儒李延平集云讀書說其詞義但資講誦皆玩物喪志乃悟至理原在無字處由是從事實踐自悔從前光陰之虛擲也生平嗜吟咏工書畫性愛菊自號晚香居士有自撰墓誌銘見金石

張奎震字文甫敦倫飭行渾樸好學弱冠遊庠疊擢優等與兄甲震弟丙震俱以文章知名時有安平三張之目十蹟秋闈屢薦不第嘉慶紀元邑人公舉孝廉方正會弟丙震守嚴州受貽

封遂不復進取講學植品以終

吳鳴珂字諫垣少讀書卽從事實踐持身涉世悉以李二曲先生四書反身錄爲法治家嚴肅上下畏服凡人有長必極口稱贊遇戚族孤寡及貧不自存者竭力周恤故遺愛常藉藉人口云

劉斯邵字又康號竹軒嘉慶二十一年副貢道光元年舉於鄉授永清縣訓導與諸生講學以勵廉隅明道誼爲先務學宮歲久就圯力白邑宰謀興作捐廉以倡復督率諸生繕治之三年功成亟爲諸生請獎而已不與焉曰是吾分也永邑地濱桑乾甲辰六月河決奉委查灾日行泥淖中不憚勞瘁詳請貧士賑一一分給絲毫致書斗侵蝕某生涉訟詣學賄屬關白厲色

南皮縣志

卷九

文獻志三 儒林

八

拒之教諭某爲通說後成巨讞上官廉其情教諭撤任斯邵兼攝值學使按臨取新生所納贄悉分與之長厚之聲噪鬢序焉其居家一以啟迪後進爲己任博收族中子弟親自教誨遠近皆奉爲儒生圭臬南皮劉氏自劉志成進士後籍不通者六十年至斯邵講學讀書從新提倡厥後人材蔚起丕振家聲子書麟孫召式從弟有慶有銘有庚有廉有成皆掇巍科後先濟美極家學淵源之盛云

張用濟字前溪弱冠游庠旋食餼七試秋闈不售父早世家中落惟以硯田養母顯者聞其名爭聘致之不忍辭親遠遊卒之以朝夕承歡致堂上躬享大壽其爲學以設中於心爲主嘗曰守中而不外馳忘念自去家居授徒五十年門人得其緒餘掇

科第者踵相接而用濟則以歲貢終生前自爲壙歿卽葬焉族弟文達公之萬受業最久爲撰墓表見金石

劉有廉字介軒號砥隅一號子方道光己丑會元有慶弟性和平嗜酒灑脫好讀書久負文名道光二十九年舉於鄉十上公車屢薦不第授徒講學多所成就獻縣名宿紀鉅維出其門下一時桃李極盛晚年瀏覽羣書手不停披嘗閱龍文鞭影病其疏略且語有未工因爲之刪改增益詳加註釋名曰幼學便讀共五卷

張鉞字越山家素貧資束修餬口鄉試屢薦屢黜遂厭心進取然未嘗一日不學以拔貢生選授晉州訓導年入老境益力行所學而卽以所學爲教當其任訓導時輒集諸生於黌舍以試

南皮縣志

卷九

文獻志三 儒林

九

其勤惰擇其雋異有行者嚴其課程遇寒士則資助之使無衣食憂得專志於學晉邑遂多名士科歲試學使者按臨郡縣新附生例納貲學官名束脩自行實則挾印結以爲質誅求無厭當事者視爲固然無所慚恧而貧者力不能納往往乞假告貸士林苦之鉞悉其情事察困窮者輒不受其貲士人皆懽忻以頌鉞則曰吾所爲乃吾職也奚以頌爲在晉八年士氣奮興文風丕振又以力之所及葺修學舍晉邑公舉多賴啓發咸豐初粵事方殷漸及江北鉞謀之邑宰某請募團丁籌防策某畏事急圖告歸後任楊公接篆未浹旬城陷楊公遇難鉞閒關歸里流離喪失家道益替惟教子課孫以樂餘年卒年七十有三鉞生平篤於實行日取朱子小學近思錄等書服膺而躬踐之

父星樓春秋高館穀所入必竭力以奉甘旨父歿喪葬一秉古禮兄弟離離怡怡數十年精醫羣醫束手之疾往往一劑而愈朱晉曾字味一咸豐乙卯舉人大挑二等任懷柔安肅等縣教諭奉天復州學正保定府教授歷任所至勉士子以敦品勵行先器識而後文藝及門多登科第者

張嗣陶字問船一字濟卿恪孫同治六年舉人萬全縣教諭母患痿痺左右奉養歷三年如一日不以他人代兄餼殉流寇之亂撫諸子成立其在萬全月有課季有攷文風一變生平性最方嚴不隨流俗其訓子弟必勉爲端人正士著有經史重姓名記孫葆田爲撰墓誌銘見金石子元翰元來孫宗瑛皆自有傳劉壽麟字閣聲性和厚嗜學年十五補博士弟子員光緒乙亥

南皮縣志

卷九

文獻志三 儒林

十

舉於鄉任阜平教諭兼主講泚川書院甄拔啓迪士風丕振登科第者接踵在任二十一年成就甚多及解組士民遮道相送歸里課子孫以終

張光簡字芸樓增生少孤事母孝兄光勳嘉慶癸酉舉人爲邑中知名士光簡潛心受學事之如父兄歿事寡嫂如母家事必咨而後行平生刻苦讀書晚年學益勤氣益下問字者亦益衆門下多品學並粹旣歿之二十年門人尹仲權張聯星等爲立墓碑以誌德教見金石

張仲淳易名之津字學樸性剛毅尙氣節不居人下遇人小過輒面折之無少假借家極寒素而不事生產弱冠食廩餼在庠序卓卓有聲居京師肄業鄉試再戰不捷值捻匪作亂津南一

帶蹂躪尤甚由是家况蕭條不能自存遂遠遊大梁淮浦姑蘇俱在文達公幕中爲之課讀文達與之津雖屬兄弟行而待之如賓友始終禮貌不減光緒初年文襄公提學四川之津又遊蜀隨閱試卷皆雅重其學晚年主講河南禹州書院歿於禹州之津之學以正性制心爲要於性理小學近思錄諸書皆功深討論云

白方祺字壽甫別號超塵子歲貢生事親最孝父性嚴方祺委婉以事能得堂上歡母病八年躬侍湯藥不少倦其事胞叔愛胞弟莫不至性藹然獨至處世之際則剛正不阿於朋友之急難不惜慷慨以赴而於意所不可者則面斥之且盛氣以相加雖旁觀笑之不顧也然卒以是忤世而落落寡合以終方祺治

南皮縣志

卷九

文獻志三 儒林

十一

家最嚴子弟雖授室者亦訶責不少貸其長幼內外之分懍如也生平讀書之餘兼精數學其說必推本於河洛嘗自云壽不過五十有二及卒竟如其言著有學庸講義河圖說靜香齋詩草人鬼辨

尹仲權字子衡號立夫生十四歲而孤凜承遺命發憤讀書十九補縣學生同治末遭冤獄被革胞弟仲楷繫囹圄仲權鳴諸省部走京師保定間凡二年卒得昭雪學使廉其情蒙開復自是學益力窮毛詩尚書兩經十年不倦光緒乙酉舉於鄉兩試春闈不第考入國史館謄錄期滿議叙知縣光緒十九年十一月聞母病京師距南皮五百里兩日夜馳歸逾三年丁母憂守制家居服闋仍遊京師庚子義和拳變作遂歸里未幾京津陷

罹其難者不勝計仲權獨以先見免自此遯跡田園研經課讀
怡如也宣統己酉國家倡辦自治仲權應徵入天津自治研究
所畢業歸縣尹聘爲自治局長劃鄉區以立基礎設研究所以
儲人才繼而兼辦田房稅契暨平糶積穀諸恤政旋又創辦團
練經營擘畫秩序井然地方賴之民國元年辭退九年夏次子
銘績供職保陽因就養嘗語銘績曰居官而愛金錢招禍之道
也爾須將此關打破已而衰老思歸抵家數日笑語如常無疾
而終年七十一歲生平手不釋卷晚年尤邃於易著周易註解
一編集諸先進之學說凡數萬言藏家待梓

李榮春字芳卿博學通經宗顏李學說精韻學尤長算術著有
九數捷徑一書凡十二卷甘隱林泉誨人不倦

正誤

(第四册)

卷七

第二十八頁十
六行第十九字 選誤舉

第三十五頁
十行第一字 季誤李

卷八

第十六頁一
行第三字 晦誤晦

第十八頁十
八行游擊 擊誤繫

第十九頁十
八行第六字 齋誤齊

第三十二頁二
十行第二字 密誤蜜

第三十四頁九
行第十四字 徐誤除

第四十二頁二
行第十一字 大誤天

第四十二頁八
行第十二字 甚誤其

第四十八頁
二行第一字 柢誤抵

第四十八頁二十
一行第十五字 陟誤陵

第四十九頁十
三行第十三字 庚誤進

第五十四頁十
四行第十一字 神誤伸

第五十五頁
一行第一字 擬誤疑

第五十五頁
五行第八字 士誤土

卷九

第四頁十一
行第六字 別誤列

第五頁二十一
行第二十一字 事誤是

第八頁二行
第十三字 實誤實

第八頁二十
二行第七字 妄誤忘

文苑

石崇 歐陽建 封抽封奕 高適 李克允 李騰鵬 張以興 徐升階 侯堪 湯淳 張發長

劉志 潘一桂 張大復 朱慶長 張雁題 張

擢奎 潘一桂 張芝郁 尹宗泗 侯澤岳 尹

宗淳 徐光儀 吳岫峯 潘震乙 季卓揚 戴葉

椿 徐光儀 吳岫峯 潘震乙 季卓揚 戴葉

善 潘昌祚 李端朝 郝錫疇 白方泉 張伯

麟 張祖繼 辛壽先 高其鎮 辛壽延 田子

模 湯樹葵 葛之覃 張元來 張正堦 劉錦

濤 徐執中 葉毓蔭 侯青照 張叔鶴 王玉

泉 張宗瑛 單忠楷 白志元 李之得 馮蓮

晉

石崇字季倫苞少子生於青州故小字齊奴少敏慧勇而有謀苞臨終分財物與諸子獨不及崇其母以為言苞曰此兒雖小後自能得年二十餘為修武令有能名人為散騎郎遷城陽太守伐吳有功封安陽侯府志作安鄉在郡雖有職務而好學不倦累

南皮縣志

卷九

文獻志三 文苑

十三

遷侍中武帝以崇功臣子有幹局深器重之元康初為南中郎將荊州刺史領南蠻校尉加鷹揚將軍頃之拜太僕出為征虜將軍假節監徐州諸軍事鎮下邳崇有別館在河陽之金谷一名梓澤送者傾都帳飲於此焉財產豐積室宇宏麗與貴戚王愷羊琇之徒以奢靡相尚嘗與王敦入太學見顏淵原憲之像顧而嘆曰若與之同升孔堂去人何必有間敦曰不知餘人云何子貢去卿差近崇正色曰士當身名俱泰何至甕牖哉後以綠珠故為孫秀等所構矯詔收之綠珠自投樓下死崇嘆曰奴輩利吾財遂遇害著作甚富惠帝復祚葬以卿禮封孫演樂陵公

歐陽建字堅石世為冀方右族雅有理思才藻美瞻擅名北州

時人爲之語曰渤海赫赫歐陽堅石辟公府歷山陽今當書郎
馮翊太守甚得時譽以忤趙王倫被收斬東市臨刑作詩文甚
哀衆皆悼借之

封抽封奕建武初元帝承制拜慕容廆假節散騎常侍都督遼
左雜夷流人諸軍事龍驤大將軍大單于昌黎公廆刑政修明
虛懷引納流亡士庶多襁負歸之於是推舉賢才委以庶政以
渤海封抽等爲股肱封奕等文章才雋任居樞要

唐

高適字達夫滄州渤海人少落魄不治生事客梁宋間宋州刺
史張九皋奇之舉有道科中第調封邱尉不得志去客河西河
西節度使哥舒翰表爲左驍衛兵曹參軍掌書記祿山亂召翰

南皮縣志

卷九

文獻志三 文苑

十四

討賊即拜適左拾遺轉監察御史佐翰守潼關翰敗帝問羣臣
策安出適請竭禁藏募死士抗賊未爲晚不省天子西幸適走
間道及帝於河池因言翰忠義有素而病奪其明乃至荒踣監
軍諸將不恤軍務以倡優蒲葦相娛樂渾隴武士飯糲米日不
厭而責死戰其敗固宜又魯炅何履光趙國珍屯南陽而一二
中人監軍更用事是能取勝哉臣爲楊國忠言之不肯聽故陛
下有今日行未足深恥帝頷之俄遷侍御史擢諫議大夫負氣
敢言權近側目帝以諸王分鎮適言不可俄而永王叛肅宗雅
聞之召與計事因判言王且敗不足憂帝奇之除揚州大都督
府長史淮南節度使詔與江東韋涉淮西來瑱率師會安陸方
濟師而王敗李輔國惡其才數短毀之下除太子少詹事未幾

蜀亂出爲蜀彭二州刺史始上皇東還分劍南爲兩節度百姓弊於調度而西山三城列戍適上疏曰劍南雖名東西川其實一道自邛關黎雅以抵南蠻由茂而西經羌中平戎等城畝吐蕃瀕邊諸城皆仰給劍南異時以全蜀之饒而山南佐之猶不能舉今裂梓遂等八州專爲一節度歲月之計西川不得參也嘉陵比困夷獠日雖小定而痍瘡未平耕紡亡業衣食貿易皆資成都是不可得役亦明矣可稅賦者獨成都彭蜀漢四州而已以四州耗殘當十州之役其弊可見而言利者枘鑿萬端窮朝抵夕千案百牘皆取之民官吏懼譴責及鄰保威以罰扶而逋逃益滋又關中比饑士人流入蜀者道路相係地人有訖而科斂無涯爲蜀計者不亦難哉又平戎以西數城皆窮山之顛

蹊隧險絕運糧束馬之路坐甲無人之鄉爲戎狄言不足利戎狄爲國家言不足廣土宇奈何以彈丸地而困全蜀太平之人哉若謂己戍之城不可廢已屯之兵不可收願罷東川以一劍南併力從事不爾非陛下洗盪關東清逆亂之意也蜀人又擾則貽朝廷憂帝不納梓屯將段子璋反適從崔光遠討斬之而光遠兵不戢遂大略天子怒罷光遠以適代爲西川節度使廣德元年吐蕃取隴右適率兵出南鄙欲牽制其力旣無功遂亡松維二州及雲山城召還爲刑部侍郎左散騎常侍封渤海縣侯永泰元年卒贈禮部尚書諡曰忠適尙節義語王霸袞袞不厭遭時多難以功名自許而言浮其術不爲搢紳所推然政寬簡所泣人便之年五十始爲詩卽工以氣質自高每一篇已好

事者輒傳布其貽書賀蘭進明使救梁宋以親諸軍與許叔冀書令釋憾未度淮移檄將校絕永王俾各自白君子以爲義而

知變

唐書本傳

元

李克允至正中進士授應奉翰林文字同知制誥兼國史院編修以文行著名

明

李騰鵬字時遠號槐亭少穎邁爲文奇麗橫溢變化百端隆慶丁卯舉於鄉七上公車不第因闢地城西築小隱亭朝夕吟嘯自適親知勸之始仕潞安推官燭奸決獄咸稱明允遷鳳陽別駕委疏漕河殫竭心力後權知泗州事以勞瘁卒於官卒之日

南皮縣志

卷九

文獻志三 文苑

十六

百姓雨泣騰鵬長於詩詞善草書工畫著有墨鳴集蛩鳴樂府並選集明詩統鑒別尤精曾創修邑志已成惜歸散佚有墓誌銘見金石

張以興字伯起又號四庵道人幼奇異年十七廩於庠試輒冠曹喜讀書經史而外靡所不窺發爲詩文靈心洞脫孤遊浩渺又爲大復空同別開生面萬歷癸未卒年四十二歲著有四庵文集十二卷李槐亭爲之序孫永譽字印白負雋才工文章以明經授保甯府經歷著政聲另有傳曾孫曉字睚之永譽長子才高學博性嗜酒喜談詩中丙子副榜後死於寇

徐升階字叔泰號麗台廷錫曾孫弱冠舉於鄉才名藉甚工詩善奕鼓琴習射各臻其妙豪情逸致具有鑒裁屢困禮部試始

就銓選授高密縣遷守岢嵐俱著政績著有麗台詩集邑志畧清

侯堪字大受守正曾孫事親處弟曲盡孝友性聰敏讀書一覽無遺爲文典麗雄偉更優詩賦有貽清堂詩稿行世書法類趙松雪而適健過之文章翰墨流譽一時遨遊秦晉齊魯間與諸名士友善秋闈屢試不售後任山東壽光縣訓導啓迪不倦多士賴其培成卒年六十六歲鄉謚和藝先生子幼鉉著有蘭竹居詩草與堪詩合刻名作述集歷官嚴州府知府以清勤著聲湯醇字潤生號似庵賓曾孫幼奇穎有神童之目登順治辛丑進士家居不仕以著書爲業精於藻鑑僑居武陵遠近就業無虛日其所甄拔皆至通顯迨遊括蒼與學使徐郡守項郡丞姚

南皮縣志

卷九

文獻志三 文苑

十七

邑令王憲副唐侍御方論文賦詩爲忘形交號括蒼七友

張發長字培厚號艮山乾隆三十年舉人會試擬魁以詩句微疵見黜大挑一等試用江西補瑞昌縣知縣明決有爲政聲方著竟因公罷吏議歸里自是肥遯田園大施教澤及門極一時之盛其教育英才樂事轉勝居官云著有禹貢撮要儀禮傳註諸書事蹟詳墓誌見金石

劉志字士心號惟勤乾隆二十六年進士歸班候選知縣不欲遠宦以曠子職辭歸故里絕口不言宦事喜爲詩平日於古詩無所不讀舊例試場不重詩乾隆二十四年鄉試始增試帖五言八韻一首志於是科得售遂終身肆力於詩兄吉宦游歸設義塾命志盡心指授執贄請益者愈繁門下人才蔚起且多詩

人焉生平好山水南渡黃河西出潼關凡安徽河南山東陝西之名山大川遊覽殆徧收其清淑之氣納諸毫端故爲詩不落凡近云年三十八卒著有詩集

郝湛字子明庠生欣子母夢鶴鳴樓上而生幼聰敏早遊庠序乾隆丁卯鄉試中式淡於仕進結廬教授以養親承歡菽水樂育英才著作甚多子思謨舉人官容城教諭

張大復原名景運字靜旃號春巖一號秋坪惟寅次子拔貢生博學工詩好遊覽生平足跡半天下而詩名隨之蓋得江山之助者多矣其所作甚夥詳著述門畿輔先哲傳有傳今采用

附畿輔先哲傳

張大復原名景運字靜旃號春巖一號秋坪南皮人博學能文尤長於詩乾隆丙申上東巡獻賦津門詔在翰林院四庫書牘錄四十二年選拔貢生授浙江太平知縣以洋案謫戍破產得

南皮縣志

卷九

文獻志三 文苑

十八

贖改遷安縣教諭性好遊嘗南浮江淮西登太行東走歷下再至錢塘吳門懷偉抱負奇氣激昂振奮一洩之於詩大江南北詩人如陽湖洪亮吉遂寧張問陶皆慕與交年七十餘馳騎射鵠如少年書舍一區琴書几榻瀟灑夷曠舍外茂樹連雲皆數百年物所謂因樹山房者也其詩跌宕淋漓神味淵永獨來獨往有不可一世之概間作小畫秀逸超衆書法出入晉唐論者有鄭虔三絕之目自作生傳營壙題碣曰詩人張大復之墓

朱慶長字衍圃幼負雋才嘉慶丁卯舉於鄉場中文已掄元因詩疵抑置十二爲文力追先正有名家風授徒里門後任寧晉教諭課生徒嚴且勤門下成名者甚衆以足疾引歸卒於家張雁題字杏園幼岐嶷敦孝友乾隆乙酉拔貢英年高才意氣不可一世一試大廷不第遂鬱鬱無聊就職北城兵馬指揮在官三月以母病告歸甲辰高宗南巡以迎駕召見授泰安郡丞親老仍乞歸遂不復出

張擢奎字揚休歲貢生幼擅神童譽丰神俊雅弱齡舉博士弟子員學使目獎之曰玉堂雋才也嗜古文制藝仿大家筆勢峻峭不屑規模時墨秋闈屢不售遂棄舉業讀書自怡善書法晚年選授奉天開原訓導引疾歸旋卒

潘一桂字薌林號江巖生有宿慧十四歲應童子試郡試第一入庠十九歲以電母琴賦見賞於學使杜文端公擢取闈郡冠軍優等食餼嘉慶己卯舉於鄉授徒家塾以二十八歲卒著有花磚社賸稿詩採入畿輔詩傳子昌祚咸豐壬子舉人

張芝郁字質仲博學工詩文著作甚富嘉慶癸酉舉於鄉禮闈屢躋教授鄉里多所成就著有豹隱山房詩賦稿

尹宗泗字東山自幼刻苦自勵夜讀常漏下三鼓嘉慶己卯領

南皮縣志

卷九

文獻志三 文苑

十九

鄉薦屢上春官不第由是詩書自娛卽以啓迪後進遠近來從者戶外履常滿宗泗講解指點最爲透闢聆其緒語鈍才亦能立悟後截取四川知縣以年老不就宗泗秉性爽豁心地和平接人待物常有春風風人之度著作甚夥

侯澤岳號念廬貢生醇謹嗜學工制藝能詩著有念廬詩草子金鴻庠生亦能詩

尹宗淳字紹程一字熙農性情和藹醇謹寡言工文藝詞旨精純入學食餼歲科十餘試皆冠其曹督學彭公曾擢爲七屬第一久困棘闈年近五旬始舉於鄉道光庚子成進士任江蘇高淳縣知縣甫下車卽訪問民間疾苦前任案七十餘起悉爲斷結囹圄一空歲饑爲民請賑除領藩庫銀外自墊千餘兩民心

感悅高淳舊有書院業經廢弛宗淳以其爲興化之本經營膏火捐廉濟之半月一課必親自批閱鄰邑慕風而來就甄陶者甚夥文風遂大振尋調荆溪縣前任李病故虧空二萬餘兩其長子亦亡幼子尚在襁褓宗淳惻然曰官故矣虧項何着遂代任不辭又值兵差騷擾宗淳撫慰備至百姓愛戴爲建生祠癸卯充江南鄉試同考官所薦多知名士以荆溪事繁積勞成疾卒於官及靈柩回籍香煙滿道士民皆哭送之

季崇慶字餘堂逢泰子以道光丁酉拔貢觀政兵部中式己亥舉人屢試春闈以額滿見遺補缺後格于例不復入場供職兵部十八年以郎中掌職方司印公餘之暇與同人結詩文社一時名宿無不折服顧以性情靜退不喜奔走京察未列一等遂

南皮縣志

卷九

文獻志三 文苑

二十

請改外出爲浙江紹興府同知旋署杭州理事廳一官借隱衙署荒涼除二三詩友外門無雜賓時或臨西湖登孤山徜徉終日得此江山相助詩境益高雖冷落間曹懷才莫展而崇慶則自喜爲人生清福一時論者皆以比香山之在杭云未幾以目疾告歸舊業蕭條鄉人慕其文名競以教讀聘後主講洛陽臨漳兩書院鹽山劉濟臣大令其高弟也迎之修武縣署遂卒署中年六十有四著有槐蔭書屋詩稿三卷對影閒談一卷生平學問淵雅其爲詩天資學力皆極優長古風尤佳而性極謙和自視常欲然不足也

張津源字問渠號鬲南爲人氣度謙和特工文翰蚤年入學蜚聲鬻序嘉慶己卯優貢道光辛巳鄉魁著有寶素齋詩賦稿渤

西詩僕雜著若干卷

劉書麟字仁圃號梅坡斯邵子道光十二年舉人授懷來縣教諭書麟幼卽好學老而彌篤雖行旅倉皇未嘗廢讀教授數十年士以科名文學顯者多出其門子二召政諸生召式舉人張全懋字勵軒嘉慶丙子優貢道光辛巳舉人性情豪邁才氣橫溢有推倒一世之概工詞翰喜吟咏著有露筠窗吟稿

葉椿字壽昌性和厚幼負才名未弱冠補博士弟子員受業邑名宿張艮山先生深荷器重授以所著禹貢撮要周禮義疏諸編學問淵博文章胎息大家書法師顏平原肄業金臺書院每課列優等鄉試十四次始獲售房師王可愚先生謂之曰汝文氣骨登古人堂奧不屑以粉飾爲工無怪功名遲暮也試禮闈南皮縣志 卷九 文獻志三 文苑 二十一 三薦不售遂講學於家多所成就

徐光儀字敬齋道光己酉副貢爲人道德純粹文筆清華讀書之餘彈琴賦詩尤工繪事信手作山水小幅饒有遠致生平以啓迪後學爲務量才成就門下多知名士卒之後及門張易堂等數十人追思德教爲之立石表墓文見金石

吳嵎峯字振東少負異才敦實行爲文力追先正稜稜有風骨游庠食餼秋闈輒不利以所學訓迪後進窮源竟委娓娓不倦遠近學者多所成就以歲貢生補永平府學訓導其教諸生亦如之

潘震乙字心潭號蓮舫晚號渤濱釣叟嗜學工詩善隸書尤好古文弱冠中道光壬辰副榜家貧授生徒甚勤課餘之暇與諸

弟子把酒聯吟談兵論史一時多所成就秋闈北上十次始博一第老益好學手不釋卷歷主葉縣慶雲書院纂修鹽山縣志光緒庚辰入挑遂絕意進取續修南皮縣志未竣而卒

季卓揚字霞鄰崇慶孫父斌貴道光己酉科舉人年十九歲溺水死卓揚每以生未見父爲憾長數歲母又卽世賴祖父母撫養成入方弱冠卽游庠食餼腹笥博洽能承家學奈屢試秋闈不售竟以廩貢終晚年邃於醫因不自炫故知之者少卓揚言語和平而性情孤傲家雖寒素總以廉潔自飭不肯干人性好吟咏率多言情之作音節鏗鏘風神綿邈有祖父餘風

戴問善字華使號諗庵晚號清淨老人原籍滄州遷南皮父鸞圖拔貢舉人官臨晉縣教諭問善幼而岐嶷目短視讀書紙一

南皮縣志

卷九

文獻志三 文苑

二十一

磨鼻十行俱下十四入州庠一時有神童之目父卒於任問善方授徒家居聞訃呼天搶地百方拮据奔走於寒風朔雪中扶柩歸葬雖裂膚流血弗顧也道光乙酉膺選拔廷試第一是科秋闈又捷後屢試春官不第同治中以大挑選新城縣教諭其教士先德行而後文藝諄諄然忠孝是務嘗謂士竭畢生精力讀書稽古若僅以文字爲弋取科名計大背朝廷求賢本意矣士人化之競來執贄受業絃誦之聲通宵達旦官署如私塾焉而其得意春秋闈者亦先後踵相接旋以丁母艱歸服闋升補蔚州學正及門之士較新城尤盛人皆稱爲眞教官厥後以老乞休優游林下者數載卒年七十有七著有左傳謠明淨書室詩文集二種藏于家問善在家在官始終以教人爲事咸豐辛

西青滄鹽交等七州縣門人得選拔者相約謁師於南皮張氏館中同門而又同年一時傳爲美談云

潘昌祚字小江一桂子四歲而孤性聰敏家貧不能就外傳母與姑授以毛詩四子書稍長從叔震乙督課之助以膏火應童子試文名甚噪邑宰姚公知爲年家子延請教讀值縣試避嫌辭歸少年耿介人皆異之弱冠遊庠食餼皆冠軍膺咸豐壬子鄉薦工制藝詩賦尤長數奇終不第大挑二等任房山教諭循循善誘以冷官終

李端朝字子莊歲貢生博通經史長於文章沈靜寡言謙恭溫和不兀坐終日無怠容秋闈屢試不售絕意進取以啓迪後學爲已任門下多知名士

南皮縣志

卷九

文獻志三 文苑

二十三

郝錫疇字壽田歲貢生歷署良鄉縣訓導岫巖州教諭湛深經術尤邃於易發爲文章率多至理名言當時歲科試士子私攜夾帶沿爲陋習獨錫疇不攜隻字而榜發輒冠其曹人皆稱爲白戰云著有九河源委辨

白方泉號醴源性孝友年九歲胞弟方剛六歲遽失怙母劉太恭人多疾病日侍湯藥無怠受業胞伯敬圃勵志讀書歷從名師年十八入學旋食餼造詣深粹舌耕筆耨從遊者多所成就性和厚行端方里黨稱長者咸豐戊午鄉試中式同邑張文達其師也撫河南時委辦糧臺論功奏保同知銜候選知縣後文達督漕撫吳委辦揚州鎮江各釐局歷著勤勞迭保特用直隸州加運同銜後選授四川長寧縣調署江安縣歷任操守清潔

賞罰嚴明境內清肅民頌其德年六十六卒於官

張伯麟字石麒一字閣卿恪孫曾浴子淵源家學弱冠知名同治癸酉拔貢生是年舉於鄉出閩縣陳弢庵先生之門由張文達推轂主講吳橋瀾陽書院循循善誘士論翕然四方學子負笈從遊者甚衆咸謂一登龍門聲價十倍也斯時吳橋縣令爲桐鄉名宿勞乃宣甯津碩學吳潯源亦僑寓吳橋與伯麟鼎足而三同爲士林宗仰焉七上公車不第晚年主講青縣永安書院光緒己亥年卒

張祖繼字睇民又字瓠肥晚號老睇窮老樸陋見者以爲村夫子詩筆傑出流輩從族祖文襄公游粵游楚老於記室以詩自娛光緒末卒年八十餘著有睇民詩鈔

南皮縣志

卷九

文獻志三 文苑

二十四

辛壽先字冠五號匏庵庠生性嚴正家門內外必以禮法里黨化之教授生徒口講指畫不少倦請業者踵至博學工書常楷寫四子書綱鑑會纂及各詩集韻學等書中歲耽吟咏所遇以詩紀之有曉園詩草濟南客草又著紀難草紀六十年所歷兵荒等事於捻匪之亂尤詳以八十四歲卒

高其鎮字輔山同治壬戌科進士以部曹改外歷署堂邑泗水清平知縣壬午科鄉試同考官喜論文所著清腴集鄉人多誦之及卒豐潤趙國華挽云垂老宦情疏落拓六曹空百里盛行文字在清腴一集足千秋

辛壽延字鶴千邑諸生博洽好古工詩著有竹君吟草詩集藏於家嘗構書畫室題其額曰航齋滄州王侶樵爲題詩云推窗

彷彿棹孤篷四壁雲山一葉風如此臥遊誰得似滿船書畫米南宮

田子模字範卿貢生博學能文少年與兄子枌應歲試並駕齊驅時稱二難張佩庚先生以聯語賀其父曰老蘇詞賦能傳子小宋才華不讓兄晚年設帳講學及門濟濟子煜琦諸生煜璠舉人

湯樹棻字馨圃貢生爲季月舫先生高足弟子經術淹貫文學優長一時及門甚多接物和霽而教人規矩甚嚴每爲學生講授掩卷而談註解不遺一字徹上徹下學者聆之無不洞然年至七十猶口講指畫不少衰

葛之覃字子周別號燕友臺老樵生而奇慧讀書過目不忘十

南皮縣志

卷九

文獻志三 文苑

二十五

二歲入邑庠旋食餼選固安訓導士之從遊者甚衆年甫二十有二也同治丁卯膺鄉薦光緒丙子成進士授刑部主事以之覃文學未入詞林論者咸爲扼腕厥後浮沈郎署者數年又以薪桂米珠居長安不易歷主方城武清等書院講席及館諸公卿家復遊幕溫州庚寅春由溫赴都改山東知縣文忠公崇綺丙子座師也聞之謂人曰以葛某就此粗官可惜也由是聽鼓濟垣者又數年受李撫軍秉衡知遇始題補高密縣在任三年愛民恤士政簡刑清頌聲蔚起詎料變起倉卒以部民毆傷鐵路小工事致德兵破城之覃單騎諭解之挾以白刃未嘗少懼卒以不得上峯諒解謝病歸密民惜其去送之數十里外多泣下者然宦途雖極坎坷而文望特隆需次濟垣時乞書丐詩文

者日衆癸巳甲午丁酉三次充鄉試同考官得人最盛王殿撰壽彭卽所取士也諸城邱孝廉在元癸巳科榜前以文就正于苑廉訪秋舫苑閱畢嘆曰子文品甚高非遇葛某不售及揭曉果出其門一時傳爲佳話歸田後課孫授徒之暇輒事吟咏每植春秋佳日扶杖攜孫循行田隴間與農夫樵子話雨課晴人皆以淵明視之之覃慈祥愷悌接人若春風在山東曾辦雒口保甲局後雒口局撤適之官高密士民感德爲立去思碑餞行之詩勒成卷帙所謂雒門春餞吟草也家居七八年以病卒著有種蕉聽雨軒詩集已梓

張元來字鼎甫嗣陶次子性剛直有奇氣幼承家學文詞瑰麗弱冠舉於鄉前輩皆以國器許顧元來不以自喜彌孳孳勵學

南皮縣志

卷九

文獻志三 文苑

二十六

平素肆力於禮嘗取經傳諸史及杜君卿馬貴與之書撮其精要補秦文恭公所不備又斟酌時俗宜稱及涑水書儀紫陽家禮以竟曾文正所欲訂而未逮者惜年甫三十一歲卒皆未成書卒之後所聘夫人慕氏殉於室桐城吳闔生爲撰墓誌銘見金石

張正堉字堯農一字銚農桐長子少負雋才工文章倜儻不羈光緒己卯鄉試第一庚辰聯捷成進士年才二十歲文名譟於都下官工部虞衡司主事充玻璃窯廠監督戊子丁外艱主講德州書院山東巡撫張勤果公愛其才走書幣延之入幕服闋回任總辦大婚禮儀處洊升員外郎賞戴花翎特授軍機章京京察一等記名以道員簡放加三品銜會辦萬壽慶典行將大

用竟卒年三十有四正墾工書善畫癖嗜金石夏璜殷琥一見卽辨其真膺故又有識古之名云

劉錦濤字麗川入庠後遊京師少司寇鏞三公其從祖也有別墅曰對椿居命肄業其中得遍交諸名流所學益進光緒間幕遊晉豫蘇鄂數省到處知名爭相延攬足跡半天下所見山川風景一於詩發之清詞麗句瀟灑出塵然隨作隨棄從不留稿所得筆資遇親朋落拓不歸者傾囊助之無吝色並精岐黃術其伯父雙南先生爲當代名醫錦濤能世其學晚年歸里適值時疫流行有求必應活人無算

徐執中字允齋姿稟聰敏學問淵博工詩善書應童子試詩列七屬第一存詩稿

南皮縣志

卷九

文獻志三 文苑

二十七

葉毓蔭字槐庭歲貢生自幼好學爲文戛戛獨造盤空硬語石破天驚試輒冠軍文名藉甚三十歲後授徒講經多所成就性情方正篤實人往往揶揄之無稽之談信爲實有遇不平事拍案怒罵而人亦復不恨嘗慕孫夏峯黃梨洲之爲人以文謁張文達公深爲嘉賞許以大器晚成因不中有司程式屢入棘闈不售及廢科舉益抑鬱不得志賁恨以終年七十一其友隋澍邨哭之以詩有歧途嘗恐歸楊墨瑣事都堪質鬼神其風概可想見矣著有醉竹軒詩草藏於家

侯青照字藜仙性聰敏十歲能屬文十六補博士弟子員歲試古場考取天津七屬第一文名藉甚秋闈兩次不售光緒甲午以優貢任江西豐城奉新餘干等縣知縣循聲卓著豐城修堤

青照以省城咽喉關係民命遂晝夜督工力不稍懈底下木椿上斃巨石水大則漫水小則蓄工竣堤南百姓均沾利益共爲立石名曰侯公堤青照善畫注意南宗凡至任所求畫者踵相接江西試畫考列全省第二江南賽畫優級三等獎牌其子經蕃亦工書畫

張叔鶴字少荀曾浴三子自幼聰慧好讀書長身玉立英采煥發見之者咸以大器相許弱冠補博士弟子員蜚聲庠序祖若父皆邑名宿故其學具有根柢所爲文淹貫古今自抒胸臆不沾沾於章句間光緒乙酉膺選拔屢躋秋闈丁酉科中副榜乃灰心進取日以嘯吟爲事其爲詩隨意流露不事雕琢而典贈風華自是大家規範蓋由寢饋於古者深也著有半桂軒詩集

南皮縣志

卷九

文獻志三 文苑

二十八

若干卷民國紀元以來充本縣勸學所長兩次被選爲省議會議員品學兼優已可概見然秉性梗介不慕榮利卒至坎坷以終云

王玉泉字漱山少聰敏工詩文不假思索千言立就一時學者翕然宗之尤工篆刻

張宗瑛字獻羣元翰子狂士也後慕揚雄爲人以玄之尚白也更字雄白爲文鑿險絕幽驚世駭俗而自喜彌甚年三十三卒著有雄白集雄白日記環瀛日記桐城吳閻生爲撰墓誌銘見金石

中華民國

單忠楷字模軒北洋高等警察學堂畢業歷任元氏安新縣警

務長調委江蘇蘇州警察廳稽查員能詩足跡到處皆有吟咏其遊江蘇也飽閱名山大川詩情益豪放著有筱葩詩草惜早卒

白志元字翰堂方祺子穎悟過人幼從父讀書一過默誦無訛年方七齡父舉紅火二字囑對以五色五行字爲限志元應聲答曰黃金以是父奇之厥後北遊燕都專心書法筆姿瀟灑蒼健翁相國同龢深爲器重年僅二十九歲卒

李之得字仁甫附生性孝友尙氣節光緒間畢業於湖北支郡師範學校歷充高小高中師範各校國文教員硯田所入除供堂上甘旨外悉充諸弟求學之費民國十年因勞致疾歿於昌圖校舍及門檢其詩文顏曰仁甫遺草付梓行世

南皮縣志

卷九

文獻志三 文苑

二十九

馮蓮池字羨周直隸第一師範學校畢業篤實力學歷充本校第二部及景滄肅寧高等小學校教員旋經北平鐵路同人聘爲河南彰德交通部扶輪第三高等小學校校長因勞疾年三十四卒于校各界人士開會追悼皆泣不可仰靈柩回籍及門諸子有送至數十里尙依依不忍去者

孝友

尹伯奇 正 鮑永 進 刁彞 刁柔 黃正 邦 王世 顯

張以潤 柴堪 棟 己 張份 永吉 乃 曾 耀 張 莊 白 德 崇 張 蔽

劉熒 張芸 張 晟 張 甫 良 張 如 椒 辛 成 仁

張曰誠 張 鑿 張 甘 茂 良 宮 文 燦 單 文 成

單達源 宮 自立 劉 廷 銳 李 寶 和 尹 東 弼

劉有庠 劉 有 翼 張 廷 銳 李 寶 和 尹 東 弼

殷天職 劉 書 春 劉 濤 許 國 珍 劉 召 式

潘鈞 張 元 翰 潘 自 洲 許 國 珍 劉 召 式

高邦和 葉 鈺 生 張 廷 選 孫 彤 彥 張 常 棣

王朝賓 白 書 銘 孫 奎 斌 于 德 海 曲 龍 占

張彬容 張 守 誠 陳 錫 韶 王 書 林 王 芳 林

高開承 齊 中 桐 張 永 蔭 羅 蔭 椿 李 士 傑

張玉貴 李 冠 軍

周 尹伯奇吉甫子遭後母之變見逐因作履霜操以見志死化爲鳥哀鳴悲切聞者墮淚名曰伯勞

南皮縣志

卷九

文獻志三 孝友

三十

漢

鮑永字君長宣子少有志操習歐陽尚書事後母至孝妻嘗於母前叱狗永卽出之新莽以宣不附已欲滅其子孫永賴太守苟諫擁護得免更始徵爲尚書僕射行大將軍事持節將兵安集河東并州朔部永至因擊青犢大勝之封中陽候赤眉害更始三輔道絕光武卽位徵永拜諫議大夫命收復懷衆永至懷果降帝大喜封關內候遷揚州牧建武十年爲司隸校尉劾戚貴大不敬事朝廷肅然行縣霸陵哭拜更始墓至扶風上苟諫冢帝不平太中大夫張忠曰仁者行之宗忠者義之主也仁不遺舊忠不忘君行之高者也帝意乃釋後爲兗州牧曾孫昂亦有孝行父德病數年俯仰左右衣不緩帶居喪毀瘠墓次舉孝

廉徵不至卒於家

晉

刁彝字大倫協子少遭家難王敦誅後斬讐人黨以首祭父墓詣廷尉請罪朝廷特宥之由是知名歷尚書吏部郎吳國內史累遷北中郎將徐兗二州刺史假節鎮廣陵卒於官子達字伯道隆安中爲廣州刺史領平越中郎將假節暢字仲遠爲始興

相

名失

字叔仁爲冀州刺史

北齊

刁柔字子溫渤海人父整魏車騎將軍柔少好學留心儀禮性強記至於氏族內外多所諳悉居母喪以孝聞永安中除中堅將軍奉車都尉元象中高祖以爲永安公府長流參軍天寶初

南皮縣志

卷九

文獻志三 孝友

三十一

除國子博士中書令魏收撰魏史啟柔等同其事柔性專固自是所聞收常嫌憚之

按天津府志刁柔入儒林傳茲改入孝友以柔與魏收共撰魏史而魏史爲世所鄙

入儒林似未允也

明

黃正邦字繼軒資性穎異丰標魁岸七歲就傳通大義精書法十三而孤家貧兩弟俱幼母湯曰爾讀書固吾志然誰爲我謀朝夕因廢學躬耕以奉甘旨每懸張公藝九世同居圖於堂顧諸弟曰天性所在勿謂古今人不相及也母歿共爨三十餘年終無間言子家棟崇禎庚午舉人孫得焜進士得煜壬子副榜王世顯力本尙實事親盡孝親歿哀慕不已廬於墓側事聞兩院咸有粟帛之賜

侯守正字廷觀號平泉七歲喪母哀毀過情終身孺慕歷事兩繼母悉無間言父歿哀慟之聲慘動鄰里奉庶母以孝聞歿服齊衰三年撫異母兩少弟俱成名自幼篤學文多奇麗年十四入太學所交皆知名士卒業而歸益潛心翰墨詩慕杜甫書學鍾王舉止威重談論直爽見者靡不敬愛晚年無意仕進棋酒閒適士林推爲高隱子楹見儒林

辛進孝家貧歲荒母久病思肉割股以進母病旋愈人以爲孝感

張文桂號培我淮曾孫事親備極孝養親有舉動先意承志萬歷癸丑歲大禋一日父與之郊行見道旁遺殮慘然心動文桂卽承父意率家僮瘞之衆嘆曰翁固澤及枯骨非若子不足以

南皮縣志

卷九

文獻志三 孝友

三十一

成父德孝子之稱由是播及遐邇焉

劉仲仁母亡依墓爲廬絕迹家門閭里嘉之

徐聚之字學甫二奇子邑庠生孝事雙親食必親侍藥必親嘗旣歿哀毀骨立喪葬盡禮里黨化之子步階庠生亦以孝行稱張文明字瑞我淮曾孫夢奇子性厭奢華廉隅自飭少失怙事母至孝承歡膝下朝夕無間兄弟姊妹備極友愛生平以義命自安每曰吾不得罪於天地祖宗吾志慊矣遇有橫逆受而不較人咸呼爲佛子云仕徽州府檢校循分盡職爲憲使梅和王公所器重歸田後晚節益勵布衣蔬食晏如也

吳推已字恕我鄉人號爲孝隱先生父巍然官教諭偶患病幾爲藥誤推已乃習醫術父藉其調養壽踰八旬母年七十有三

疾篤藥不效推已七日不食籲天願以身代母果愈壽增十年符其禱後遭兵亂母柩在堂兵至欲焚泣曰甯殺我勿焚母身被兩矢不去兵義而釋之生平善舉甚多卒年八十一歲子維哲登鄉薦

張永吉字還白謚曾孫慟父早逝時切哀慕事母務得歡心遇時鮮非奉母弗入口教弟成立養妹終身悉遵母命以行督學聞其名嘉獎之品行文章爲瀛東冠以明經終

張耀字燦然庠生以旃孫少喪母哀慕弗忘父患痰疾朝夕侍奉三年弗怠所有資財悉畀異母弟衣食之需自爲營謀雖貧無一言及之

清

南皮縣志

卷九

文獻志三 孝友

三十三

白德崇字伯修庠生父養鈔學行俱優食餼有年崇禎戊寅北行羈蒙古二十載德崇日夜思慕順治戊戌聞父入都步行五百里牽衣號泣感動同邑張顯吾張肇祉貸八十金贖歸鬻產稱貸竭力償之家由是貧而父子完聚終身怡然

張以潤南皮縣人居滄州業儒不成乃學醫世父某爲易州訓導老且衰以潤勸之歸其二子曰捨此生且無以養以潤曰我任之世父聞之喜遂告歸以潤躬養爲治特室朝夕在視寢食出視疾日數歸左右無違異縣有相迎者與世父期及期不至漏鼓三下家人勸就寢世父曰更遲之言未畢而至以潤少孤母某氏守節數十年舉邑上其事得旌子棠舉乙科以潤猶及

見之

錄方望溪
文集補遺

柴堪棟字柱礎克振子歲貢生周歲識之無父奇之十三補博士弟子員稍長文益進試輒冠軍爲文操筆立就性至孝父母年九旬色養備至友愛庶弟損已之產以讓之遇事慷慨見義必爲鄉里賴之以子廷望貴贈吏部考功司郎中

張份字道思昕子幼勤學於經傳貫串精熟晚歲口授諸孫猶背誦如流年三十補博士弟子員後絕意仕進閉戶讀書其事親尤篤孝自孩提至白首六十年如一日丁酉詔舉孝廉方正眾推份堅辭不就臨終謂其家人曰積善餘慶天道可徵吾家科名久未發諸孫必有取甲第繩祖武者厥後累世進士果如其言有墓誌銘見金石

張乃曾字一齋號前川雍正甲辰舉人幼遭母喪哀毀若成人

南皮縣志

卷九

文獻志三 孝友

三十四

稍長事父及繼母先意承志愛敬不弛于終身當大事盡哀盡禮撫養弟妹多人備歷艱辛而怡怡無少怠鞠亡弟之子女一如己出任河南洧川知縣以興學爲急務鄰封歷年水道一經勘定遂貽百世之利補山西孝義知縣值歲饑振濟平糶捐俸施粥所全活無算蓋以孝友而施於有政者也又讀書之餘兼精書畫書法由歐而進於王畫則山水花木工秀絕倫云

張荏字夢叶份子庠生性至孝年七十猶作嬰兒慕父病肺鼻衄體羸甚必枕荏肱始寐左右更遞凡三月血痕漬衣袖執父喪哀毀逾恆少子受長以雍正五年進士累官河北河務兵備道築堂迎荏荏先迎其母至一堂之內愉色婉容荏生五子皆克自振拔受長尤顯教之以忠孝宅心以清慎勤奉職以庶富

治民自縣尹以至監司官愈責責之愈嚴長子卿子官浙江鹽場月必手書示以治鹺察奸之義故兄弟居官皆有聲其厚德待人則嘗於稔歲焚貧戶租契及質劑更以米粟周之生平不輕講學惟以淬厲躬行爲先務每日直人之所以生也誠天之所以命也博野尹公會一誌其墓以爲參理學之精云

張藪字中郎份子爲人有至性敦古道率真任樸讀書體認宗旨專務躬行作文一以平實爲宗不規規時好屢試不售而天懷灑落忘情得失年二十八始補博士弟子員其事親無疾言無遽色陶陶融融至性流溢家故貧甘旨時缺輒典衣物以給寧與妻子甘淡薄饜糟糠而堂上之奉未嘗不具也兄弟六人壘篋之樂無間形骸視兄弟之子猶子也有遠商任某者落拓南皮縣志

卷九 文獻志三 孝友 三十五

無依藪恤之與謀生計任故資送其妻子還鄉舊奴某貧無以養貸之衣物令取值爲貿易奴耗盡弗問也生平無一語欺人亦不虞人之相欺云

張蓀字季畹莊弟庠生與兄俱以純孝稱兄子受長以進士歷官河北道蓀子惟寅以進士歷官御史及福建汀漳龍道受長迎其祖母於署中蓀千里隨之惟寅官吏部時蓀視之京邸到京甫二十日忽心動急歸其母果臥病母歿哀泣致疾時時夢母來遂不服藥而卒蓋生死不肯離膝下也孫文定公嘉淦督學直隸時雅重之及歿爲撰墓誌銘見金石

張芸字冬生份子庠生數歲母邁疾輒能日夜執扇驅蚊蠅父痲於足出入扶掖者十餘年旣析居伯兄迫於負鬻已田償

之至乏食無怨又爲仲兄三兄經紀家事且爲置產莊有宅近五兄推以益之四兄病侍湯藥兩月不倦諸兄子孤者咸撫育成立或讓以田宅子慶長進士發長舉人孫端城進士瑞城舉人自是科名鼎盛戈濤爲撰墓誌銘見金石

張晟字曦之邑庠生幼端靜不苟言笑動止必以禮雖出自華胄蕭然若寒素好學於書無所不讀明季父攜家避難金陵母不欲南徙因留侍養未幾難作奉母村居匿窟室中聞江左大亂日夜南嚮號泣仰天籲禱祈父生還旣而果歸庚辰歲大侵勸父煮粥賑饑多所全活嘗步郭外見有扶老攜幼欲覓食他郡者謂之曰天下大饑適將安往姑栖予別墅暫圖餬口再謀生計可乎衆皆泣拜其慷慨好施多類此

南皮縣志

卷九

文獻志三 孝友

三十六

張莆監生父性慷慨不問生產家計日落莆竭力周全以承父志繼母宋邁疾危甚思食林擒時沍寒不可得莆號泣求之適同邑王氏林擒一樹方冬結實莆得以進母遂瘞人以爲孝行所感好施與無德色鄉鄰待以舉火者無算或負金貧不能償焚其券姨母孀居撫一子貧不能自存割地三十畝以贍之董村楊寬家貧父死不能葬畀以地一區羈旅無歸者必爲謀生計並資以金老而失所者必留養歿則經理其喪

張如椒太學生濟少子幼失怙奉母殷氏曲盡孝道至老不衰辛成仁字奉三太學生爲人天性最厚內而家庭外而鄉黨事多可傳其犖犖大者則母病嘗糞厚恤宗族廣爲推解然皆行其心之所安而毫不近名也有墓誌銘見金石

劉燠字順休自號六其居士生而穎敏束髮時出語即驚其長者十歲就外傳日讀萬餘言弱冠以第一人庠旋食餼嘗取大學聖經六其之義一一反躬自省歸於實踐又取宋涑水紫陽所訂禮儀可以施行於今者節衷古意而是正之一時稱爲通儒田宅頗饒三昆兩庶弟居必同財推肥取瘠不以各母而起異同之嫌初學於王先生東野繼受業滄州劉師退先生悉能得其真傳迨兩先生歿竭力資助其家終身不少間待諸女弟恩誼周備貧者爲營恒產招其子孫舍於家飲食教誨咸使成立親友窘乏賙給之求者答之率踰所望以故三黨與交遊皆無失所之歎律身以古恥就時趨惟求自信不肯徇人素號能交一秉正則不屑爲風氣所搖奪志在扶衰振靡應諸生試輒

南皮縣志

卷九

文獻志三 孝友

三十七

冠曹屢躋秋闈終不自悔居恆訓其諸子曰若輩當以正學爲宗學有三塗厥歸一致曰名儒曰名臣曰循吏名儒學以爲己教以爲人苟獲充其志行克當輔弼之選者名臣也克稱宣猷之職者循吏也其生平專力實學實行類如此年七十五卒子四人長吉季志先後成進士仲奎廩膳生後胞伯燠叔仕增廣生皆以文學世其家有四劉之目云

劉裝字臨敬賦質敏捷讀書一過輒不忘英年補博士弟子員所爲文偉麗奇絕善飲酒兼好聚書每酣飲時輒讀數卷以爲快於孝子悌弟事尤津津樂道父母或有拂意裝斗酒承歡姑述奇異不經事以博親一笑而解下撫諸弟則和樂如慈母端莊如嚴師諸弟受教皆勉爲善士性好施予佃者積債甚夥乃

悉焚其券曰吾不以此累汝等也至今人猶稱頌不置云
尹模字式庭大學生以子貴贈文林郎性純篤幼讀書穎悟過
人家貧廢學貿易三十餘年業漸豐每以不逮親存爲憾春秋
薦享終身思慕與仲兄同居既老兄謂之曰爾我皆老可析居
矣答曰兄食指繁多析則我固有餘而兄恐不足不如三分之
兄取二弟取一兄執不可模以田產多半固讓之後諸兄及姪
輩有貧乏者復各給田十餘畝喪葬嫁娶力爲經營鄉黨咸以
盛德稱之子宗淳見文苑

王一良字純善六歲喪父哀慕終身每言及輒隕涕躬耕事母
五十餘載秋時母病危思冰不可得焚香夜禱果得冰進母病
乃瘳母好施因體母意惠濟閭黨族侄士琇鬻子爲贖回授室
南皮縣志 卷九 文獻志三 孝友 三十八
給以衣食鄰人邢某贖故產尙負八十金卽折券與之康熙癸
未河決成災遠近多賴以存活助婚葬置義田善行甚夥後舉
鄉飲介賓年八十八歲卒子孫蕃盛孫玠璽並武魁曾孫觀成
舉人而孫珩更克繩祖武登彰善坊云

張鐸字振斯自幼記誦過人爲文驚其長老顧以祖母年暮又
以一身嗣兩房父母及叔父母年亦漸高遂輟業而親定省有
姊出嫁家中落分宅割產以資其壻之讀俾得成名堂伯叔及
族間伯叔兄弟侄孫皆財產與共無畛域外家子孫貧不能自
存者攸助之欲讀書而無力者招與諸子同學紀文達公爲撰
墓誌銘稱其庸行甚難焉文見金石子四丙震進士

季逢泰字裕源號月舫事繼母以孝聞友愛兩弟昇泰吉泰壘

箴至情白首彌篤且以學問相切磋幼承母訓深自刻勵十蹟
棘闈道光乙未與長子崇遠同舉於鄉以年老不赴公車清德
碩望推重一時四方從學之士趾錯於戶知名者甚多

張曰誠字一堂號夢曇至性過人樸實無華父丙震官嚴州府
幼隨任極得歡心弱冠父母相繼歿跋涉數千里匍匐歸葬事
伯叔父母尤謹兄曰敬中年患病躬侍藥餌一夕恆數起及病
篤衣不解帶者數月紀氏姊貧且病迎歸朝夕調藥不假人手
同治壬戌舉孝廉方正未就而卒

張鑒廷珍長子家貧甚父歿母王氏在堂一弟尚幼乃躬親稼
穡以養母且供弟讀俾入邑庠弟出嗣堂叔鑒以貧故弗能娶
子然一身母子相依爲命每食必奉甘旨雖凶荒流離不廢也

南皮縣志

卷九

文獻志三 孝友

三十九

已則啖糠覈率以爲常母患風痺晝夜侍側衣不解帶者二十
年母疾篤夜禱於天願以身代私割股肉以進母歿呼天搶地
越三日葬母事畢徧謝族人水漿不入口者四日矣次日室中
寂無聲衆排戶視之已死時咸豐丁巳四月八日也年四十歲
族黨哀其行備棺葬之殮時見股創儼然無不爲之淚下云
張甘茂幼失恃父以揮霍罄家資甘茂爲人傭工日夜作苦得
錢卽以奉父父遇之嚴稍不如意輒批其頰負罪引慝怡色受
之父晚年病痿動輒需人甘茂左右扶掖便時倉猝每以手捧
糞父臨終泣謂之曰吾負兒矣迄今百餘年人猶稱張孝子云
宮文燦字秀章邑諸生性篤孝其世父無子撫以爲嗣曲意承
志終不得其歡心時受扑責未嘗稍怨鄉鄰或慰之答曰此事

親之道未盡耳因深自刻責起敬起孝罔敢或渝父亦漸察其誠卒善待之如己出焉

單文成字斐軒太學生生有至性事親以孝聞異母兄可成不善治生產屢罄文成屢分與之可成卒二子廷蘭廷柱俱幼以長以教至於成立而廷柱又卒婦張以青年撫孤守節卒賴文成之顧恤得全活鄉里稱道比漢薛包云

單達源字本植號耐圃性篤孝家貧課讀他邨以供母會母得暴病卒痛絕飲食欲以身殉時值初冬池水方冰遂躍入及救出不一二日竟歿其族弟青選徵詩文表揚之

宮自立家貧年七十餘猶肩挑貿易無論得利與否必果餌奉母時學孺子以娛其親

南皮縣志

卷九

文獻志三 孝友

四十

劉有昂字仲軒嘉慶丙子丁丑聯捷武進士候選衛守備事父母曲盡孝道弱冠卽後堂伯鳳城嗣父母均鍾愛之有昂性情醇謹出入必以告不命之出不敢出凡與父母言必稱名受職後不願仕進家居事親以終

張永嵐字維城四十喪偶子女俱無親族有勸其續娶者永嵐則以吾弟有子可以兼祧對終不再娶生平以持家訓弟爲事使弟永綏從師習武中道光己酉武舉持家克勸克儉遂致小康年七十餘以侄治平兼祧少亡遺孤建捷生甫兩月永嵐撫育訓教後入武庠由軍功賞藍翎五品銜

李桂林字丹坪性慈善歲捨棉衣以濟貧寒祖母田患疾漸不起桂林割臂煮藥以進人皆莫之知家人見其臂部血跡急究

問之始言其實而病遂瘳子星垣充本縣警務所長

劉有庠字檢書年十九喪母哀痛幾絕事繼母亦以孝聞食廩後貢成均授徒鄉里資修脯供甘旨能得父母歡初生母馬氏病晝夜侍側衣不解帶者累月醫藥罔效有庠憂之夜間顛天願身代割股和藥以進惜病未獲痊妻任氏盡婦道族黨無閒言

劉有翼字敬之布政司理問性忠厚不善治生好施予捐地二十餘畝爲義地宗族有不能喪葬者嘗周濟之兄弟析產弟分外莊田宅不欲往有翼以己宅讓之無吝惜意父母歿哀毀骨立每遇先人忌日必齋戒素服親率子孫致祭至老不倦待鄉里寬恕橫逆弗較鄉人稱長者焉

南皮縣志

卷九

文獻志三 孝友

四十一

張廷銳字敏庵元正長子弟廷錫補博士弟子員家中落父令析居各與地二十畝光緒初父歿家益衰值歲饑人相食繼母張以兩子食指日繁又各與地二十畝廷銳凍餓自甘恐母氏養膳不足辭不受註於分書願以奉母時人稱之曰孝子有輝諸生

李寶和世業農家貧失學事父能得歡心嘗著綵衣舞親側鄉人傳爲美談云

尹東弼字黼廷庠生事父母先意承志出就館必諄諄誥誡家人善事勿違處兄弟尤盡友愛其胞弟震廷出嗣胞伯德清所承遺產無多遂並本分田產與弟均分其輕財好施恤孤濟貧尤爲鄉里所稱許子二長元承次元熙庠生皆能承父教

殷天職字祿卿母患中風症精神失常輾轉牀第五六年天職侍膳侍寢未嘗有倦容一日兄被人毆以身代之毆者愧悔而去光緒初開設酒店值荒旱餓殍載道外欠千餘緡悉焚其券又施藥餌棉衣等物人至今稱之

劉書春少失怙家貧恃工作養母每飯母先食書春忍饑立侍母得偏枯症書春延醫療治不懈每日爲母櫛髮盥面閒時則爲母濯足值農忙辨色起自炊供母飯後外出力田凡應用飲食各物俱置母旁午回家仍自炊如前數年母歿書春以哀疾終

劉韓濤字海舫庠生三歲喪母事繼母能得歡心父病疫卒哀痛幾絕設館授徒藉束修以養繼母自館中歸每市鮮果肉食

南皮縣志

卷九

文獻志三 孝友

四十一

奉母不私妻子數十年不少衰鄉黨宗族稱其孝無間言

許國珍字瑞廷性篤厚與叔父已析居咸同間歲饑其叔父將攜家乞食國珍止之遂毀分約仍同居光緒間親鄰以五世同居義重鄉閭額其門

劉召式字振南光緒元年舉人性孝友兄召政諸生不治家人生產召式盡以田產百畝讓於兄自赴懷來主書院講席旋授故城縣教諭薪俸之蓄常寄家奉兄鄉黨稱之年五十八歿於官子四維藩山東蓬萊縣丞保藩山東青州府農林學校校長錫藩山東蒲台巡警局長東藩

潘鈇祚字同珍性肫厚篤於同氣父故兄弟析產鈇祚分得全宅令諸弟仍同居曰人生兄弟有幾手足詎忍分離耶終身如

未析產然諸弟感之鄉里稱賢焉

張元翰字達生號良甫嗣陶長子光緒五年舉人由教諭過班知縣分發河南署澠池其出治一以明之呂新吾爲法德宗西狩道路轉輸仰給州縣元翰事事愛惜民力他縣以徵調苛擾聚爲變獨澠池宴然元翰遇事持正數拂知府意不得久於其任大府以輿論不平仍調權寧陵元翰故善捕盜巨匪華三聞其至自縊死法國教士安西滿楊熙凝以非禮要求元翰拒之而杖其徒及去任百姓詣省乞留者數百人母劉宜人聞而喜曰吾兒眞爲民父母矣元翰性至孝弟元來孝廉英才短折病時禱于祖考請損己年益之母卒日夜悲號遂得疾越百餘日死母匱旁大府以孝行聞于朝得旨旌表而前所治澠池寧陵南皮縣志

卷九

文獻志三 孝友

四十二

兩縣士民又以循績上陳大府據以入奏請編入國史孝友傳亦奉旨俞允蓋生平政績卓著而孝友其根本云孫葆田爲撰墓誌銘見金石子宗瑛以文學著

潘自州字仗仙幼失怙事母至孝偶有過觸母怒輒跪請扑責怒不釋弗敢起母病延醫問卜晝夜環侍嘗數月不著枕席母歿哀毀逾恒厝柩一室守奉三年對姊妹兄弟尤篤堂兄自精性高古人或不敢與之語自洲獨相處甚歡族有姑母寡且貧年老無依迎而養之生平以義自守誠樸端方有君子風焉潘鈞祚字仲堅幼失恃事父及繼母至孝光緒庚子拳匪起命妻奉繼母先避自負父而逃因父避亂於鹽山嘗乘雪夜往省手足凍裂事兄尤恭兄歿視侄猶子宗族稱孝友焉

田熙琨字玉軒詩禮堂啓事官性純篤喜讀書逢人卽勸爲學事繼母能盡孝道定省溫清皆出誠意人無間言與異母弟熙琳親愛如孺子終身無忤子翊墀耀墀皆有聲庠序人以爲厚德之報

高邦和事親能得歡心母有病醫藥罔效邦和割肉調藥以進母卽愈

葉鈺生字礪堂廩膳生性端謹動遵矩矱父漁浦素不信醫一日病篤堅不服藥鈺生煮藥跪而進之父感其誠勉強服用卒以獲痊父卒家日窘遵母命兄弟四人析居鈺生設帳講學所得修金悉以奉母母曰旣已分爨此錢不必歸公鈺生終不安每年分半數歸母與兄弟餘自食之迨母歿兄弟先後謝世此

南皮縣志

卷九

文獻志三 孝友

四十四

例始停鈺生自號六愚子著有六愚詩集

張廷選事繼母至孝家貧爲人傭工奉母必具甘旨繼母弟與廷選分爨而母之生養死葬廷選一人任之不以責弟鄉里重之

孫彤彥字傑三母患痺痿臥牀七載醫藥定省不少懈遐邇稱之

張常棣字華圃親故兄弟同居弟好揮霍不忍怒責時以善言相勸卒致改過歸於勤儉人以爲難

王朝賓字印堂庠生兄故侄幼恐其不能自立割己田與之並加意教導與子無異

白書銘字子丹年十四父病延醫診治無效書銘深夜暗割股

肉如掌烹以奉父神色恬然

孫奎斌字達周父廷善早故母呂率四子度日田產無多極艱苦妻張賴母家資助自置田數十畝藉以仰事俯畜家道漸裕年逾七旬兄弟尚同居云

于德海家極寒兄弟各一皆自謀生活德海藉傭工以養每年稍長作小本營生無妻孥炊爨自任之終日思有以悅其母二十餘年無倦色母九十二歲卒里人欽其孝助之葬德海每至母墓號泣因得疾不起

曲龍占字雲峯父早亡隨母度日凡事不忤其母見母不悅必盡力寬譬母喜始已母病癱瘓不能自動者四十餘年龍占始終未嘗離左右光緒二十六年義和拳變起龍占夜負母行二

南皮縣志

卷九

文獻志三 孝友

四十五

十餘里送至戚家母八十五歲卒因悲泣得疾不數年亦卒張彬容字森圃生二歲父歿伯父菊庵撫之年未冠伯父又歿家貧甚母氏高伯母氏湯兩孀一子相依爲命彬容嗜讀書夜無間嘗奉命赴田中守禾攜書對月誦之然無力購書每得一未見之書則就母前誦讀紡聲書聲並作至夜分始罷稍長或勸其出就外傳泣曰兒不養親乃反勞親養兒乎遂設帳於家爲童子師其族人蘭浦侍御藏書甚富重彬容之爲人時與相往來彬容亦傾心受教因得博覽羣書學業大進然不尚詞章以躬行實踐爲務當是時溧陽殷公樹森宰南皮教諸生崇實學一時人才蔚興彬容秀出儕輩以縣試第一入庠遂食餼殷公自以爲常哀之得歐陽詹不是過也自是文名藉甚遠近延

聘者踵至皆以母老辭蓋由少及壯由壯而老不肯一日離膝下即有事外出至期必返恐煩老母倚閭望也素性清介不慕榮利惟藉館穀以養親其事伯母養生送死禮無或闕一如其母人不知其爲猶子卽伯母亦自忘其無子也

張守誠字葛農號且癡年十八應童子試縣府院三試皆冠軍補博士弟子員旋食餼光緒十五年六月母蘇氏病危守誠焚香祝天刲左臂肉和藥服之病遂愈母終莫之知也是年十二月病復發又刲股和藥以進而母病革不得下咽竟卒守誠雖斯徒跣不納勺飲者累日其天性之篤如此後歷任四川鄰水仁壽等縣知縣有政聲循例納資洊升道員賞花翎加二品銜在官不畏彊禦遇事敢任尤以廉介自持罷歸時兩袖清風書

南皮縣志

卷九

文獻志三 孝友

四十六

畫之外無長物卒後幾無以葬著有耐軒詩集二卷

陳錫韶父患瘡久不愈後延西醫治瘳割已肉以補之瘡卽愈
中華民國

王書林字藝庵家素貧兄弟五人幼嘗依外祖家稍長率諸弟歸共理商業屢經失敗志不稍回卒致家業富有待諸弟仁愛備至處家一秉大公終身無私產八十九歲卒

王芳林字杏村業農母氏張年七旬雙目失明芳林耕種之暇膝下承歡二十餘年無懈怠處兄弟以友愛終身惟兄命是從子惜三庠生北洋高等警務畢業

高開承號貽軒兄德軒患癱症臥牀七載衣食需人開承躬侍湯藥未嘗暫離姊適人貧不能自存爲姊築屋安居養之終身

齊中桐字茂生生有至性民國二年參江北護軍使幕聞父病即假歸奉養父病愈促之行不忍去父曉之曰吾所希望於汝者前程遠大能立事功亦孝也不得已回原職無何父病又發竟不起中桐得電奔歸痛不欲生自此一意奉母不再作遠遊計兄中桂有宿疾中桐與之同居一室兩榻相對飲食藥餌必躬必親十餘年不懈於胞侄問渠問樓等不惜破產促令遠地求學問渠等亦各能樹立人皆稱其篤於骨肉云

張永蔭字海颿增生山東候補縣丞試用知縣事繼母能得歡心父大為感慰鍾愛之精醫學就診者常滿門活人無算

羅蔭椿字壽如廩生事父母色養備至宣統三年任保定郵政局長因親老辭歸奉養終身不懈

南皮縣志

卷九

文獻志三 孝友

四十七

李士傑字俊三言行醇篤母陳氏年八十以腿疾不能行士傑為肩輿與兄昇母以遣悶家人治膳恒不得母氏歡士傑親執庖饌或遭呵斥則欣然承受不敢稍違處兄弟終身無一言之忤人以爲難

張玉貴性篤孝民國十九年二月父病延醫診治日夜徬徨父歿不進飲食歷十餘日在砥柱橋下縊死

李冠軍字子卿初入戎行後歸里為鄉校師勤懇樂育不責束脩與兩兄析產以沃田相讓自取礪瘠者而願獨養老母事親教子怡然自安民國十一年土匪入其村鄉鄰家人皆逃匿冠軍以元母在獨不避既而大軍至兵匪激戰冠軍以維護老母故中流彈死而老母得以保全

忠義

高世棟燦弟 劉書燦子 陳應武 張芝馨 季崇逵

徐復禮 劉成 周士芸 尹仲棟 周書年 張煊 徐

田長貴 劉文炳 齊中林 張澹川 張董得 徐

玉珂徐清徐玉 郭景石 張嶺 張鴻軒 張慶元 劉

張玉貴張清徐玉 張鳳嶺 張海洲 張慶元 劉

林玉齡 孫悅茂 馮祥龍 徐侯經 徐高永 楊

維齡 李富貴士侯 孫中孚 徐侯經 徐高永 楊

徐鳳桐 柴黑虎 蘭福星 張厚榮 劉

語曰自古皆有死民無信不立國之所賴以存者豈不在忠義哉晚近來人情翻覆趨避日巧而慷慨捐驅大節凜凜者亦時出其間且往往出自武夫戰卒於以歎廉恥尚在四維未盡絕也鄭重書之以維風化而時代不論云

明

高世棟字隆吉舉人與弟世楨 同登萬歷戊午京兆試崇禎十

南皮縣志

卷九

文獻志三 忠義

四十八

一年戊寅冬東寇圍城世棟世楨約衆守城除夕城破兄弟同罵賊死世棟三子長燦廩生次煒燿皆庠生見父叔殉難亦同盡節一門忠孝人欽重之

陳應武河間忠順營都司陞保定府遊擊未抵任崇禎十二年

東寇犯任邱應武防守死難見府志

清

張芝馨仕福建台灣淡水廳竹塹巡檢乾隆五十二年正月閏

逆林爽文執芝馨欲降之罵賊不屈賊支解之死甚慘賞世襲

恩騎尉

季崇逵字綸堂逢泰子幼年讀書頭角崢嶸道光乙未年甫二

十三與父同舉於鄉以玉牒館議敘選福建古田縣知縣時粵

事方殷初到任上官卽委辦光澤糧臺已而糧臺陷以身殉之
大節卓著彌增科第之光云有墓碑見金石

徐復禮廂白旂人咸豐間隨勝帥南征陣亡

咸豐三年滄城陷劉書升奮矛刺賊見殺梁山劉德張四徐

成孟三梁大劉八梁宗武徐三張猶龍楊三張大發皆殉難

見滄

城殉
難錄

同治七年紳民殉難合傳

同治七年捻匪餘黨張總愚統衆數十萬越潼關由山西之蒲
州渡河兼程東竄出太行繞畿輔四月初一日邑城陷武舉兵
部差官候選守備潘竣三字傑菴與賊巷戰賊以長矛環刺之
傷其目負痛轉戰力盡而死

賞世
職

高家集監生高容崑率其族

南皮縣志

卷九

文獻志三 忠義

四十九

衆高西崑高鳳臺高樹寶高樹軒高樹立高光耀等蘆莊侯錦
川字蓮舫明經本隨嗣父也年六十二歲率其族衆侯本封侯
永泰侯本正侯本太侯錦林及庠生張蓮鏡從九楊廷山

賞世
職

從九郭振芳封贈五品郭慎修武生王鴻章監生李克讓武生
張廷棟六品軍功張德有監生劉文齡張餽庠生湯源漢侯選

典史張彝倫

賞世
職

武生劉清源文童張集慶潞灌鎮人潘辰字

沈德等先後禦賊皆死焉同時死者潘碩祚以槍斃賊賊以洋
槍環擊死潘貞元持刀逐賊賊支解之侯本立崔林山禦賊死
尤烈王樂羣潞灌潘氏傭工也携主人弱子幼孫避賊賊追奪
諸幼脅之行發憤投井死姜長和以鋼鑊殺賊賊支解之蘆莊
侯金鑾罵賊賊斷其頭趙文元罵賊不屈死劉五戰敗投井死

傳順潞灌潘氏僕也賊脅之行堅不從賊追之急投井賊怒以長矛攢刺殺之許正月賊掠之堅不從賊怒支解之投尸溪水又潞灌鎮張德明張德生張德齊張萬育張萬順張掄秀張之語張發劉成名何力田楊其有林向榮鄭洛二李外米大大馬莊王慶太韓宏及其子洛黑孟文彩及其子長榮馬大本及其子洛困李興和吳步雲韓福貴周官太張洛七李鳳舞張淑南張玉同及鄉民周安仁周長發周武張茂張玉山張景溪張爲麟張長庚張連升張春寅張連城張幹笏陳福有許貞元王東羣章專章福李文奎張長齡張虎兒劉成仁崔連雲崔連生張呈麟杜簡德張大本張之謨張長卿張友和張長法張連瑞張發祥張殿龍王豐太王豐和王攀桂章大貢章大智王誠潘貫

南皮縣志

卷九

文獻志三 忠義

五十

三張廷用張文中王朱崔珍崔鐸劉敬勳劉清泰劉殿龍劉文成劉錦雲徐萬倉單祥禎鄭造鄭洛三白二梁云祥石如枚許本立許恪許心篤許心傳許洛二呂天希門馬薛立平杜同德劉虎劉狗李文全李文虎李進福李福孟喜姜祥牛黑陳文孫福榮孫金平柴春霍某蕭友柴發祥郭馬俱同時遇難事平通政使司劉入奏蒙恩賜卹入忠義祠建坊廕襲各有差

舊志

柴祿田字仕者同治七年捻匪入其村祿田獨持刀抵禦一賊用長矛向腦後刺之大罵不止而死

劉成潞灌武舉潘象善之義僕也籍隸巴蜀幼貧從父母乞食於洞庭湖畔時象善携眷赴湖南千總任舟泊湖中成父携成求鬻象善憐而留之方四歲象善視之如子教以詩書成聰慧

穎悟輒能孰習署中公私庶務無不盡心贊助後象善調任浙江溫州衛千總卒任所乏子女僅遺妻劉氏身後蕭條舉目無親主僕相泣於官廨成哀懇同僚資賻奉主母劉暨象善靈柩北歸營葬如禮光緒二年歲大祲乏食成爲人傭工得錢以養主母賴以生活主人嘉其義爲之娶妻以延其嗣云

周士芸自幼讀書有投筆從戎之志光緒二十年充樂字營哨書甲午中日之戰死之

尹仲棟性剛果家貧不乞人憐以壯志不獲伸居恒鬱鬱光緒甲午中日起衅國家募勇仲棟慨往應募戰歿鴨綠江濱

周書年字少詡廩貢生生平雅擅才華而性情真摯處世接物純抱熱心清季令各縣興學被推爲勸學總董書年毅然任事

南皮縣志

卷九

文獻志三 忠義

五十一

不稍推諉奈時值新舊交爭之際事多棘手嘗與人言曰國之興亡在學學不興是不啻自促其斃也抑鬱久之宣統元年冬投高小學校前井內死遺言仍以興學困難爲念人多哀之

民國

董德昌性沈毅寡言語少負大志初從師讀旋即捨去曰大丈夫當叱咤風雲縱橫天下豈甘沈淪於寒窗筆硯間乎稍長習武事燕南故多健者日與遊技益進居恒排難解紛扶危濟困有古俠士風清之末葉以軍功游擢蘆溝橋守備見清室政事日非大憤遂入黨陰與革命同志相往還力飭軍備思乘機顛覆清室辛亥秋革命軍起武昌義旗一揭天下響應不數月而共和告成德昌欣然曰吾志遂矣乃歸故里徜徉畎畝間不復

問人間事矣都門友輩僉以共和告成正男兒有爲之時力勸德昌乃入陸軍部司軍需非所志也會袁氏謀帝制德昌奮袂呼曰我輩同志以多少頭顱碧血換來民主國家何物袁賊敢蓄異志吾誓誅之乃隨陳英士謝持楊庶堪趙鐵橋諸同志在京組織暗殺機關謀刺袁氏時袁氏已知革命黨人將甘心於已也乃深居簡出戒備綦嚴德昌計不得遂益憤慨然曰吾縱不得袁氏亦當殺其黨羽以寒逆膽遂與同志程國珍懷彈逕往事洩被執交執法處非刑研訊體無完膚猶大罵不少屈竟於民國三年九月七日與國珍同時被害時年四十一歲董長鈞德昌從姪生而穎異膂力過人民國元年求學天津入國民黨憤袁氏倒行逆施陰蓄異志乃隨陳英士等及其叔德昌密

南皮縣志

卷九

文獻志三 忠義

五十一

組暗殺機關於北京時德昌謀刺袁氏黨羽長鈞懷槍實彈從之往事洩被捕下獄與德昌同被害時年二十五歲又董長貴長鈞胞弟自幼抱負不凡光復之後求學滬濱民國三年德昌長鈞均以努力革命慘被殺害於北京長貴聞耗大痛乃輟學易名楊興華隨陳英士黃復生張偉張錫九等密組金融機關印製鈔票接濟革命軍餉事機不密爲虹口捕房偵知在兆豐路與張偉張錫九黃復生同被捕時袁氏仇視黨人日甚因以三十萬金賄捕房引渡張偉被殺張黃囚禁長貴賴人救護釋出卒以受刑過重死於民國四年六月十二日年僅二十二劉文炳字相辰北洋將弁學堂畢業曾充山東陸軍四十七旅礮兵營長授陸軍礮兵上校民國四年夏剿匪陣亡陸軍部給

恤金十年以卹其遺族

齊中林字杏符附生北洋陸軍速成學校畢業授副軍校民國元年將校研究所畢業授正軍校充山西陸軍軍士學校教育長以在五原剿蒙匪功升營長調山西陸軍中校團附參加湖南戰役升團長衡山之戰奉令退入湘潭城待命湘潭被圍數月糧盡彈絕士兵傷亡過半六年十月城陷衝圍出身中數彈猶整隊行四十餘里傷重難行遂自戕聞於政府晉中校加上校銜祀昭忠祠著有夜戰實習摘要野外勤務參考陸軍步兵教練參考諸書

張濬川直隸陸軍第三混成旅五團一營二連連長民國八年克復岳州湘南一帶作戰陣亡

南皮縣志

卷九

文獻志三 忠義

五十二

張煊字俊臣民國八年充革命軍第四師士兵屢立戰功洊升至營長奉令移防福建廈門攻漳州身被九彈陣亡

徐玉珂字競明徐玉清字佩潔兄弟也世居徐官莊民國九年十二月突有大股匪襲入村內二人憤極持槍痛擊時久援不至衆寡懸殊相繼死焉然全村賴以保全

郭景石講武堂畢業曾任第十三師營長民國十年剿匪於北京西山陣亡

張鴻軒張文清繆德山林方森張彥倫李自升俱充南區保衛團團丁民國十一年歲饑滄南盜匪蜂起出沒於邑之南境團總張元坊及隊長齊長叙率團禦於馮家口迤西以衆寡不敵鴻軒等六人皆死之

劉玉貴性誠樸家貧民國十三年充保衛團丁縣東南境匪氛弗靖派保衛團往剿至寧津屬之五窪場玉貴爲匪擄去死甚慘縣優卹之崔煥印性勇敢充本縣遊擊隊兵士張蓋臣膽氣素豪熱心任事充本縣民團教練均於五窪場剿匪陣亡

張鳳嶺充上海警士民國十三年三月因截擊盜匪中彈殞命政府優恤之

張海洲字慶圃充本縣警備隊兵士民國十三年在五棘科剿匪死之年三十一歲

張慶元于蘭坡趙樹棠張玉林俱有膽畧慶元尤勇敢過人民國十三年充本縣保衛團團丁駐防半壁店九月賊突至團迎擊之以衆寡不敵慶元等四人俱被擄樹棠在半壁店先被害

南皮縣志

卷九

文獻志三 忠義

五十四

賊脅慶元蘭坡玉林行至白塔寺慘被毆撻慶元罵不絕口惟求速死賊怒剝慶元頭皮與蘭坡玉林同遇害人皆惜之

孫悅茂驍勇有幹畧唐孫莊人民國十四年滄南間土匪甚熾悅茂倡修圍寨以禦工成而匪至包圍西南兩面索銀不遂槍彈雨集村人皆失色悅茂率衆抵禦連斃賊十餘賊始懼包圍一日夜竄去村人受傷者四悅茂受傷尤重未半日殞命鄉人哀之

馮祥龍魁偉勇猛立志從戎民國十四年充本縣保衛隊士兵駐防半壁店突有土匪闖入搶掠祥龍追之至滄境楊八家莊中流彈殞命邑人士壯而哀之開會追悼並厚卹其家

徐森華字蔚堂速成武備學堂畢業禁衛軍騎兵營連長民國

十四年江蘇柳河之役陣亡

徐鑫華字銘齋練官營畢業充陸軍第二鎮連長民國十五年
在山東臨城陣亡

楊惟齡性豪俠有膽畧民國十五年三月股匪入村搶掠村民
皆逃避維齡獨登敵樓開槍轟擊約二句鐘卒以寡不敵衆被
匪擄去罵賊死

李富貴侯士俱有膽畧龍王李莊人民國十五年三月突有大
股土匪至村民登寨抵禦以槍械不敵闔村惶恐士及富貴趨
寨西北隅發槍痛擊賊潰退婦孺皆乘隙逃避匪猝由東南隅
入士及富貴俱被創仆地大呼曰吾雖不能殺賊亦無愧鄉中
父老言已遂瞑見者莫不流涕

南皮縣志

卷九

文獻志三 忠義

五十五

孫中孚性英武讀書善擊射時值股匪搶掠龍堂焦山寺兩村
中孚應地方自衛社之召往援社丁戰敗中孚獨殿後以衆寡
不敵死之時民國十五年九月也鄉人壯其勇開會追悼並爲
之請卹

侯經畚字叔仁民國十五年充河南西平鐵路貨捐分局局長
靳兵潰亂搶取局中財物經畚以事關公款力拒之潰兵持槍
擊經畚中腰脊創劇身故

高永善勇敢過人民國十六年二月村中有警奮出擊賊頭部
中彈殞命鄉人惜之

徐鳳桐有膽識民國十六年土匪猖獗鳳桐倡民團衛閭閻治
安四月聞何家寨有大股土匪鳳桐率團往援身中數彈殞命

馬文祺性樸誠大莊子人民國十七年秋突有匪百餘闖入其村圖搶掠村人李姓極力抵禦匪不得逞匪偏村人火其房文祺獨不從遂被害同時又有李寶安者登屋持槍轟擊斃匪數人匪嘯聚擊之焚其屋亦被害

孫叔鰲字傑安尚氣節重公義直魯軍幹部學校畢業充第六軍衛隊團排長民國十七年死山東觀城之戰又林龍廷字子雲性剛勇充第六軍兵士亦於是役戰死

劉哲明字逸軒少篤學性耿介不輕然諾民國十一年畢業於交通大學旋服務京漢路局數載無廢事十七年冬充山東龍口統稅局局長無何叛軍擾膠東一日有叛兵到局索款哲明曰局款者公款也征之於民解之於國以供正用豈若輩所宜

南皮縣志

卷九

文獻志三 忠義

五十六

擅取耶峻拒之叛兵悻悻去翌日晚叛兵蜂擁入推之出遂被害屍骸無存事後亦未蒙矜卹時人惜之

柴黑虎名武身高八尺面黑口濶目炯炯如電有勇力嘗自挽犁而耕舉數百斤之石如拾芥村人因名之曰柴黑虎家貧親老傭於族人爲守禦一日武在礮樓酣睡賊百餘猝至登東牆武警醒與柴保正槍擊之傷賊數人彈絕賊縱火保正逃逸武不退伺賊近又擲炸彈斃賊賊怒彈如雨射武乃奮臂登樓頂大呼一躍而下爲賊執四賊左右執其臂一賊棒其背武振臂一呼擲四賊於十步外賊懼向武頭部擊數槍斃之並剖其腹賊去村人皆痛哭

藺福星忠勇能任事民國二十年充本縣第六區保衛團副班

長九月押運軍用糧秣赴舊州至滄境陳敬莊天晚猝遇匪福星因被執慘遭非命尋覓數月屍體未獲由縣政府卹其家張厚榮王耀清素稱勇敢充西區保衛團團丁民國二十一年一月隨副區團長吳文起赴各鄉巡邏適聞巨匪闖入姚家庵卽趕往剿捕不意羣匪知覺開槍拒捕厚榮耀清奮不顧身擊斃男女匪各一生擒匪二餘匪竄去厚榮耀清身受重傷越日殞命士民哀之爲開會追悼

善行

賈琰 賈玘 劉榮祖 寇輔 湯殷 張謨 張

張省 張永清 張廷儀 張昕 劉榛 張卿子 高

星 孫成貴 張廷儀 單秉心 單承宗 張璠 朱奉良

單須 王大蘊 何承魁 葉上 高鵬 朱登 張璠 張美

徐德麟 高步雲 高虎仁 張仲瑚 朱仲琳

張樹昌 張經世 張以濟 李光煦 張常挺

潘恕田 潘大典 張濟江 潘懋田 尹占德

尹占甲 劉有容 齊衍慶 張鴻猷 張百祥

吳曾泰 王楓森 胡桂亭 強殿瀛 徐殿祿

李輝 許寶善 張嘉蔭 孟維鐘 殷毓岫

周寶麟 侯本棫 傅景雲 梁裕德 劉景濂

陳有聲 孫廷善 張鶴齡 葛登墀 季崇勳

尹元熙 戴官彤 尹仲楷 姜世震 劉新卿

張鎮堂 張鍾秀 吳忠甲 白志忱 徐蘭如

周寶珍 王致襄 白俊卿 侯叔瑩 楊春亭

張炳綬 單芳芷

張炳綬

張炳綬

張炳綬

張炳綬

張炳綬

張炳綬

張炳綬

後晉

賈琰唐魏公耽之父也徙燕地隱居不仕安於耕鑿沈潛高蹈

南皮縣志

卷九

文獻志三 善行

五十八

積久彌光啟子孫之相業作唐宋之賢臣贈尚書僕射

賈玘字仲寶耽之曾孫黃中父登天福三年進士宋初為刑部

郎中終水部員外郎知浚儀縣事嚴毅善教子士大夫子弟來

謁必諄諄誨誘之初通判鎮州葬鄉里羣從之未葬者十五喪

孤貧不能自給者咸教誨婚嫁之

元

劉榮祖耆老也至元中與里正黃進道社長李澤開濬郎兒口

洩境內諸水入海使無陷溺之患功成作濬川記刊諸石永杜

爭端百世賴之

寇輔南皮掾也至大三年監縣忽辛修建廟學輔與馬仲良麴

諒董璧魏翥張益共襄厥成夙夜惟勤不辭勞瘁門工弗成捐

資獨任之工賴以完

明

湯殷父澄有善行創建大悲閣於興化寺殷早遊成均仕吳江丞廉幹有聲尋乞歸築室蒔菊爲林泉退休之樂遂號菊軒翁爲人忠信篤敬資人婚喪兩膺褒封晉位憲副而謙抑自下鄉里賢其隱德後學思其風采焉祀鄉賢子寶見仕績

張謨字子顯璿曾孫敬以持躬和以處衆有惡少使酒毀辱若無所聞鄰人侵田笑而讓之恤孤救厄掩骼助喪善行甚夥弱冠馳聲庠序與弟謐齊名學行兼優數奇終不第士論惜之子以旃仕單縣

張三省庠生少有氣節才瞻學富親疾寢食俱廢祈以身代族

南皮縣志

卷九

文獻志三 善行

五十九

人有怨輒力爲勸解恒面折人過能改卽止所居近河見堤上有仆地者詢之乃舟中被刦毆至將死遂扶歸養之愈資遣還里子如玉庠生學行有父風孫茂華崇禎癸酉舉人

張朝棟字文峯謐孫以廩生工書法人呼爲八法散聖性溫恭與宗人聚飲輒曰積善讀書乃吾家祖訓願以此相期咸嘆服族中子弟或才而貧資給之使就學重氣誼嘗出千金脫故人子於難至今鄉黨稱之

張文炳字肅我淮曾孫夢奇長子生而穎異美丰姿好讀書弱冠補弟子員及長倜儻不羈遇事敢任不爲利害所撓周急重義親族賴以舉火者甚衆未幾厭帖括奮志韃韃後仕至守備運籌帷幄有儒將風

尹應聘字起野諸生少孤撫於叔父游庠後卽從事治家嘗書簿面云凡事從公勿圖一時便宜其存心可以想見叔父乏嗣多爭端應聘不與其謀並不受其地善全骨肉輕視財產人皆以爲難得有墓碑見金石

張福蘊字慶祉家資鉅萬福蘊好氣負奇彊力勇敢崇禎時賊盜蠡起城西門少林寺僧慧印與賊通賊至南皮皆主慧印數苦縣人福蘊直造寺叱慧印出奮擊踣之馘慧印赭其寺盡簿車甲器械輸之官遠近稱快當是時鄉民之桀驁者不敢平面視福蘊善良懦弱爭倚福蘊自存福蘊聲傾南皮令順治元年清已定京師命某王將兵徇下縣訛言大起民啼走以爲將族誅我家聞大兵已次滄州益兇懼問計福蘊福蘊曰有我在於

南皮縣志

卷九

文獻志三 善行

六十

是北至捷地叩大軍營門大言曰南皮男子張福蘊願白事一見大王旣見說王曰李自成爲不道大兵誅之甚善然大兵所過縣民或不知聖天子救民之意與大王所以奉承天子之心淆惑訛言匿藏竄伏以饑餓以死今南皮令棄城遁民惶恐不知所爲福蘊敢以家所藏黃金百二十白金千錢五十萬縑布五百匹米豆千石茭藁具車二百兩馬羸牛羊彘各若干再拜獻大王麾下用以犒師惟大王一聽福蘊飭軍士無怖驚小民豈惟福蘊舉縣人實受其賜王未及應福蘊復疾言大王而許福蘊之願也若其不許福蘊不敢開罪大王然十步之內有不識大王者在福蘊出所持鐵椎實案上重五十斤以示王福蘊長七尺餘鬚髯若磔鐘聲偉視王固已心重其人及聞言則益

大喜曰坐壯士我聽而言王乃解佩劍授福蘊曰軍士有不聽令者劍斬之福蘊立起持劍皆言所言於王及王所以語福蘊者以王令軍中復以王師爲民除害告喻父老衆心大定爭持牛酒犒師王師駐南皮二十餘日無敢入人家田園取蔬果者

清

張永清字虛白朝棟子附監生精健饒才智歷世清白善治生產儉以自奉事親備極豐腆恤族贍貧慷慨好施尤喜成就後學寒苦無依者多賴之謹守家法端直自矢不肯趨附炎勢值流寇擾畿輔避亂金陵居數載一身經營肇建新宇家道復隆隆起返里益廣施德惠崇禎庚辰歲大禋道殣相望煮粥賑饑

南皮縣志

卷九

文獻志三 善行

六十一

全活無算

張廷儀字羽叔號季逸性嗜學有雅度爲文清新疎秀弱冠入學屢試京兆不第康熙辛未貢成均遂放懷詩酒與諸耆舊唱酬無虛日尤能仗義疎財遇人有急輒傾囊濟之畢生渭東才優落拓教育之終其身山左張柳生遠客孤蹤養之數十年資遣歸里一生襟懷灑脫而門庭清肅座無雜賓持身方正經明行修舉可爲鄉人法云

張昕字暹之號嶠采永譽子少孤撫於張王兩母事之孝養備至不少異自幼攻苦讀書未弱冠游庠爲高才生後屢困棘闈援例入成均爲人慷慨樂施贈萬鶴年葬地不受值贈驢馬夫人至於鬻產生平文章近徐天池氣節近盧次梗而始窘步於

下庠終止足於上舍亦與二子相符云

劉榛字茂林別號叢叔歲貢生六歲失怙事母至孝遇事關白而後行稍有小失母嚴責之榛怡然聽受母霽顏然後敢去伯兄樟仲兄植皆早卒與姪貧等雖已分爨而榛則一視之其治家農商兼務產業日興自奉儉而待人厚年饑且疫出倉粟平糶散藥餌無缺更出錢助賑遠近存活者甚多縣有善舉必先倡辦晚年因勞致疾臨終戒子貧等親名師益友勿墜家聲正容而逝

張卿子字冠軍號崇山莊子少年游庠食餼值家道中落上事祖父母父母下率諸弟力學一以授徒自給季弟受長卒成進士卿子以拔貢官鹽庫大使及子金城登仕遂告歸卜居林泉

南皮縣志

卷九

文獻志三 善行

六十一

莊莊東故有漢雋不疑墓卿子立義塾其旁以教鄉族子弟家居十六年善行多可稱道子三金城拔貢德城舉人

高星字仲樞庠生好施與族人以有以房產質者憐其窮而焚其券使無饑寒親友假貸悉稱意與之無德色亦不責償泊鎮東有通衢每遇水潦行人病涉捐金首倡築隄並建兩橋遠近稱便又於薛家窩施造義渡以濟行人邑侯居公因公賠累羈不得去傾囊資助授餐適館厚贖其行居公感激泣下每語人曰古道照人吾未見有如高仲樞者

孫成貴字天乙好施與遇丐者必視老幼酌寒熱以給飲食或無寸縷凍將斃即將所衣絮袍給之且婉言勸誠使爲餬口計值兵燹遠近來依者男女不下數百人悉爲安置給以米薪偶

至河干見十餘人坐冰牀陷入窟急招人救出邀至其家更衣款留數日贖助以歸有武城人自京來足生毒癰囊橐已罄臥於村外廟中卽爲延醫調治二十餘日始痊臨行助以資斧後其人踵門來謝已辭世年餘矣遂奠諸墓痛哭而去子彤賓字殿臣拯危濟急一如其父每見父衣給人卽解己衣衣父力不能再備忍凍無怨言父病調藥必先自嘗聞有良方雖數百里必往求之父子善行至今嘖嘖人口云

單秉心字正吾弱齡失怙母撫養成立爲人剛方正直勤儉持家家道漸豐日以好善樂施爲心困乏者量力周恤助其婚葬康熙四十九年河水成災人多流離乃出粟贍貧救急求無弗應遠近感頌卒年九十三

南皮縣志

卷九

文獻志三 善行

六十二

單承宗字子丕武庠生性孝友篤於本源遭兵燹族譜散佚歷三百餘年傳十餘世戶口繁衍漫無可稽率男厚庵詳諏確訪不辭勞瘁出資授刊悉獨任之乾隆己丑創修砥橋一切工料錢米先自傾囊墊辦工賴以成親族貧乏者多所分潤壽七十八子龍閣字雲蒼太學生樂善好施克承父志初修砥橋多所襄助乾隆五十年又建東橋陸續修補必先倡率置家塾擇親族子弟能讀書者延師訓誨助以膏火先後列膠庠食廩餼者不勝數歲荒煮粥待饑者施棺施藥善行甚夥

朱奉良字君卿諸生有隱德某教諭故於任貧不能歸奉良爲籌資斧送其柩回籍子慶長登賢書

單須字賁其太學生候選縣丞性豁達恤孤憐寡排難解紛遇

公益事視如私事乾隆間雨水爲患李營盤張營盤迤北若干村面積約數百頃積水不洩恒有至春不能布種者須目覩心傷首倡義舉協同李性若張蘭如呈縣轉詳於乾隆二十七年
在鬲津河北至宣惠河計二十餘里挑溝一道將積水洩入宣惠河內溝頭尾各樹碑以記其事鄉人至今稱道不衰
王廷萱字榮之漢軍鑲黃旗人性慷慨道光十五年輸資修治薛窩上下隄工完固獨任其成一方賴之

吳庶登字瀛賓好讀書垂老不倦事父母有孝行待人以誠雅重儒士獎勵後學或有一長可取稱道弗衰好施與親族貧寒無告者多周濟之子嶠峰有傳見文苑彰庠生仁孝能紹父德手輯有益語集錦訓俗規二卷信手錄一卷

南皮縣志

卷九

文獻志三 善行

六十四

高鵬搏字圖南號惺齋貢生襟懷沖淡琴書自娛年至八旬手不釋卷經史皆有批評劄記尤嗜性理書舍三楹顏曰惺齋日坐其中冥心孤詣世事榮辱漠焉若忘乾隆五十七年歲大饑典地十餘頃買糧數千石以濟窮民全活甚多

張璠字奐遠幼靜默至性過人十歲失恃長姊撫養成立爲學不事帖括專務實踐言行恪遵庭訓嘗祭墓歸墜馬折左肱父驚就視強笑語以慰親懷事繼母三十餘年無間言弟璿得痰疾言動失常度曲意調護之俾得自適捐資首倡建宗祠於城內復於村居建小宗祠時展孝享從兄聲越年老無子奉養於家卒爲營葬祖母黃孺人之姊子及孫繼祖母宋孺人之姪孫母祖安人之兄與子若孫適畢氏姑母之子並養於家爲謀喪

葬婚娶晚年爲子鐸延名師兼教戚族子弟資其膏火先後皆成名僕人年老者推恩相與死則恤其子孫比閭窮乏待以舉火者恒數百家宣惠河溢捐數百金建橋於筓劉莊前行旅至今便之以孫丙震貴贈奉直大夫

張美蘊字充實文蔚子庠生慷慨磊落少孤事母至孝伯叔兄弟俱極友愛從姪銓四歲失怙撫育若己子田賦丁徭代爲經理俾專心向學逮成立房產悉歸之尤好義均民竈之役極力調停不惜勞費邑人德之晚年構園亭植松竹退老其中日與親知棊酒娛樂遠近稱爲隱君子

張大蘊字獻宸文炳子性和易胸無城府遇事退讓喜怒未嘗見諸色疎放清逸喜村居脫畧形骸與二三野老話農桑課陰

南皮縣志

卷九

文獻志三 善行

六十五

晴杯酒盤桓有高士風無子以堂兄美蘊仲子庠生鏡爲嗣孫

溱淇俱庠生聲名藉甚人以爲善報云

大蘊疑卽府志大用庠生

何承魁字圍照樂善好施本於性成乾隆五十七年歲大饑道殣相望出藏粟數千石全活萬餘家附近數十村以是得無苦次年春粟將不給妻王氏脫簪珥助之王氏壽至九旬餘子天成千總孫雲龍監生俱能慷慨嗣前徽曾孫維清武生玄孫金榜弱冠中武舉泗水縣守備

葉上選字賁園邑庠生習岐黃尤精外科四方求醫者踵相接嘗築一室以便病者休息於富者但施丹藥貧者兼與飲食雖惡瘡無厭也道光辛巳秋大疫鄉有于姓老人無親屬病疫歿殯殮皆身任之道光癸未大水米價昂貴乃開倉出粟平耀鄉

里賴以全活積欠至五十餘萬錢甲申冬悉焚其券毫無德色
尤樂曲成後學堂姪梓十四失怙撫恤提挈無異已出又爲延
師教讀得以成名凡族黨親鄰中子弟之少有才者咸資助以
成就之年八十六無疾而逝次子椿道光壬午舉人曾孫仲恂
咸豐戊子舉人科第累葉不絕

朱登陞字雲階慷慨好義道光三十年邑議修文廟及書院慨
捐銀二百兩部議獎給九品頂戴

張鎔字冶原美蘊子豪邁不羈有丰儀見義必爲勇往不避行
事綽有父風放懷棊酒寄興畋獵皆有俠致亦偉男子也

徐德麟字趾祥仲次子自幼善騎馬雖龍性難馴者亦使之俯
首聽命從父官湖南恒不施鞍勒騎生馬馳騁數十里以爲樂

南皮縣志

卷九

文獻志三 善行

六十六

家世業武道光辛丑登進士榜爲狀頭後由太原營參將解組
歸田咸豐初年畿輔盜賊蠭起德麟倡辦團練以保桑梓知縣
趙士桐倚以爲重捕殺匪人多名餘黨斂跡地方賴以安堵其
爲人賦性忠厚接物和平晚歲逍遙林下布衣草笠輿野老農
夫雜處人不知其爲武狀元也

高步雲字峻陞鵬搏子庠生性孝友承繼母歡無異所生季弟
金英繼母出田產任其自擇家藏書畫泊鎮居宅悉以與之己
乃徒居於鄉族人婚嫁無力者曲爲籌畫田有被人侵占者不
與較嘗曰爭地一畝不如治地一畦子五長麟閣庠生贈刑部
主事仲虎仁季熊夢俱有傳孫七雁題庠生封中憲大夫思愨
有傳思慧舉人玉樹增貢封顯武將軍曾孫二十人其鎮進士

端鎮廩生靖鎮舉人玄孫丙照舉人

高虎仁字濟寬步雲仲子太學生孝親敬兄敦宗睦族二十歲入太學勵志讀書淹通經史年未三十而卒

張仲瑚字亦珊幼讀書才宏識博每遇名人書畫把筆臨之無不肖屢應童試不售貧困益甚嘆曰坐守青氈將如承先啟後何也遂棄帖括督理家政蚤作暮息勤勞忘倦業卒復家聲丕振性慷爽豪邁庭闈怡怡然親朋杯酒話舊愜愜懇懇然遇困乏者周恤之暇輒披覽經史究心書畫俱入名家奧窔絹帙縹緗堆累滿架延名師課讀豐館穀隆禮貌子玉册拔貢工部主事有傳詳仕績孫二長文達公之萬次之京舉人

朱仲琳字彬佩國學生平生重義氣爲宗家朱勿軒觀察經紀

南皮縣志

卷九

文獻志三 善行

六十七

家政經手鉅萬十餘年出納分明人咸仰其高誼子晉曾舉人官教授另有傳

張澍昌字茂園唐家務人慷慨好義濟人之急清同治七年捻匪之亂津南各鄉受其禍無或幸免時捻首張總愚率衆走唐家務澍昌恐其蹂躪全村也迎至家中多方招待壁間掛有青鋼劍家藏舊物也張見而艷羨之澍昌慨然持贈張感甚下令不許騷擾全村安堵無鷄犬驚至今村中父老回憶往事猶稱頌不置云

張經世字允升事繼母極孝母怒則負牆悚懼屏息立於母前俟稍霽命之去乃去性尤慷爽同治七年大亂村人議修寨而難於貲經世捐資以成其工鄰族有貧不能葬者每爲備棺具

光緒五年卒享年九十有六

張以濟字次溪嗣父玉山早歿嗣母馬性剛烈子姪必繩以禮以濟侍奉數十年無少忤鄉黨有爭訟者輒爲之排解遇有公益事必身任之塾辦資財亦所不惜清光緒元年邑侯尋公贈德惠鄉閭扁額三年滿家莊崔家窪等村贈德周北鄙扁額李光煦字玉山號崑峯平生輕財好義鄉鄰有訴訟者必力爲調處塾款亦所不惜化及鄉人數十年無訟事家法嚴子姪輩小有過譴責立施不少寬假至於敬長卹幼和睦宗族始終不懈至今父老猶稱道不置焉

張常挺字春園武庠生熱心公益同治間因地方不靖聯合滿莊賈屯子等十八村練團自衛團中費用均常挺一人負擔時南皮縣志

卷九

文獻志三 善行

六十八

鄰村多被賊患獨該等村賴以保全

潘恕田字村農年十九遊庠不志功名專心醫術以救人不設肆不受酬施診四十餘年活人無算嘗曰讀書非爲功名學醫非爲酬報惟期明理活人淑身樂善成爲完人而已

潘大典字宗籍生平樂善好施堂兄時叙有宅一所因年終債逼請鬻之立還其券慨助錢數百緡俾得償債值歲荒斗米千錢饑者甚夥大典盡力所能及與以米粟或半收其價年屆八旬猶精神矍鑠子三人孫七人曾孫二十六人

張濟江字鼎臣江蘇候補巡檢賞戴花翎性慷慨好施予遇親族鄰里無力婚葬者無不仗助有妹適同邑朝陽村李姓早寡子之鴻才襁褓貧無以炊乃迎其母子贍養於家同治九年重

修縣城吳令繩曾聘爲董事經營擘畫不遺餘力年餘葺事鄉人咸感其德乃以積善之家額其門

潘懋田字樸農天資渾厚言行足爲里閭坊表於橫逆之來直受不辭鄉人感化悉爲良善平生絕口不揚人短聞有揭人之私者必正言勸止之於貧苦親鄰無不周濟一鄉稱善士焉
尹占德字恒修性正直勤稼穡節用致豐富凡親鄰有不克婚葬者求無不應光緒初歲饑焚借貸券數千緡凡兩次見有游惰不務正業者痛責不少假孝養父母友愛幼弟年八十七終人至今稱道弗衰孫仲權舉人曾孫入庠者四

尹占甲字殿一性稟寬厚恕以待人卑幼有過亦無急言遽色生平樂善好施光緒元二年歲饑餓殍相望占甲開倉周濟所施概不取償四鄉無以爲報乃以忠厚可風額其門子六人入庠者二年八十歲卒

南皮縣志

卷九

文獻志三 善行

六十九

劉有容字裕堂性高潔足不履城市好佛晨起盥洗必正襟讀佛經一冊淡泊自甘不涉心妄求富貴處世能忍逆來順受人問曰世上有等人毀我侮我妒我騙我害我可將何方教我有容立答曰此等人極易治你只是任他避他耐他讓他敬他再待幾年看他喜吟咏詞意恬適出于自然嘗自咏七十老人詩云不求富貴不辭貧花甲周來又十春每向明窗尋樂趣蠅頭小楷細書勻其風概可見矣一生手不釋卷延獻縣名進士紀玉亭教子讀長子松屏成拔貢作宰江西次子松喬入邑庠復設義塾教授族中子弟成就甚多

齊衍慶字雅範性豪爽見義勇爲嘗以地方不靖倡辦團練任勞任怨不稍懈盜匪肅清地方賴之又善醫術遇有貧病者則助以藥餌無德色

張鴻猷字嘉田幼好學性篤謹呐呐然如不出諸其口勤儉持家道漸裕好善之心老而彌篤族鄰有困乏者量力周濟無吝色子二人孫七人照祥照堂均游庠序

張百祥字方毅庠生候補巡檢品行端方生平嚴於取舍非義之財絲毫不以入已不受饋遺精通醫術有求者不問寒暑無不立往診視全活甚衆鄉人德之

吳曾泰字交山號拙齋幼年讀書穎悟試輒冠軍年甫冠補博士弟子員屢試秋闈不售遂絕意進取專課子姪讀鄰里來學

南皮縣志

卷九

文獻志三 善行

七十

者不取束修循循善誘恒至夜分不倦姪麟甲麗甲子金甲均先後入鬻序論文餘暇輒以治家處世之道訓子姪迄今其家猶雍睦儉約克紹先緒云

王楓森字拱宸性慷慨孤寡貧寒咸受其助其堂叔之訓營商虧累罄產不足償其債楓森慨然自鬻其田得價三千金代爲清債且持家勤儉教子有方子四長文炳游庠次文煥畢業法政歷充軍政薦任各職四文煜中學卒業歷充軍警委任等差胡桂亭字俊卿壽官凡親族有爭竭力排解勞怨不辭尤好施予每逢臘日必親自煮粥以備施捨行之數十年從無間斷其心地慈祥可見一斑云

強殿瀛字仙洲武庠生性慈善濟人之急重金不靳某年歲歉

見有鬻子而食者傾囊相助義聲達於遐邇光緒二三年間大旱野無青草道殣相望殿瀛惻然憫之盡出倉儲分于親鄰賴以全活者甚衆鄉人至今稱之

徐殿祿字倖山性嗜學有雅度爲人敬以持己和以處衆遇事排解有仲連風晚年尤喜鈔經書竟日不輟魯魚亥豕校讎無訛識者多稱爲善本焉

李墀字丹廷號楓陞十七歲失怙依伯父玉山成立事伯父如事父動作之間無不以伯父爲法性慈祥凡善舉無不樂爲清光緒十一年德州老虎倉河決直灌沙河沙河無岸順流而東所過盡成澤國本村與鄰村民衆因築堰起爭勢將用武墀聞之急招雙方爲首者數人曉以大義並親自督催築隄搶險順

南皮縣志

卷九

文獻志三 善行

七十一

水北下所需料物概由已出鄰近各村田禾賴以保全事後各村議送扁額卒不受

許寶善字世珍太學生慨爽仁厚鄰人有死不能殮埋者盡力助之遇有不平之事卽出而公斷以故遠近無不佩服甚至有不入公堂而至寶善家訴曲直者子兆麟武舉人

張嘉蔭字同蘇文達公之萬長子邑庠生蔭生大理寺評事保加同知銜性孝友端介和平不阿時趨居恒折節讀書文字書畫而外一無所嗜文達歷任封疆入贊綸扉皆追隨奉養不忍稍離佐理治家不預公事每屆歲時歸里展墓與親族鄰里父老桑麻話舊恂恂退讓藹然可親遇有困乏解囊以助聞有善行極口稱贊不置元旦賀歲具衣冠徒步而出不命輿馬非公

不至長吏之庭偶相值口呐呐無縱談弗一語及私工書法直追歐虞尤精繪事以憚南田爲宗花卉禽魚寫生逼肖得者咸奉爲拱璧喜博古鑒別金石考覈精富中年卒於京師

孟維鐘字金聲性篤厚族鄰有貧不能自給者周濟之無吝色古心道貌動遵禮法課子尤嚴年九十六歲卒子化行戊子科舉人

殷毓岫字雲齋少與弟讀書鄉塾聰穎異儕輩以家貧佐父經商日漸豐裕嘗因歲饑出粟數十石濟貧者家臨衛河適泊鎮重修義渡虧累甚鉅獨力墊辦無難色晚年復精岐黃術有求必應貧者並施以藥餌濟世活人之志二十餘年如一日以賑捐輸資獎九品職銜子二長琦舉人次珍國立大學畢業獎舉

南皮縣志

卷九

文獻志三 善行

七十二

人宣統元年贈奉政大夫

周寶麟字瑞符性剛直見義勇爲所居村南有古橋年久失修勢將坍塌寶麟鳩工購料躬親監造煥然一新距橋南里許道路低窪每逢夏季積水沒脛行人苦之寶麟招集村人於農隙培土修築遠近稱便並與張占德各捐募制錢數百千於村南天齊廟前創建學舍十餘楹今之第四高等學校卽藉其舊有學舍而擴充者也子鳳樓拔貢

侯本棫字樹琴弱冠游庠序資性溫和篤親信友濟人之急傾囊不悛光緒乙亥丙子連年饑饉典地得錢千餘緡自備凶荒見鄉人艱窘異常遂出八百緡分用之衆欲署券備償本棫曰此爲救急計耳何以券爲卒不許

傅景雲字子瞻性豪爽鄰人有爭景雲至無不立解或備杯酒通殷勤釋兩造宿憾遇強悍者不憚面折以奪其氣必底于平而後已鄰人某猝病歿因誤會其子幾陷大獄景雲力爲剖解事得釋是以凡是非不決者咸折衷於景雲焉

梁裕德字恩波天性慷慨見鄉人極貧者輒周濟之無吝色光緒戊申鄰人楊中禮誤被命案牽累無力昭雪裕德惻然憫之代爲辯訴呈數上始得平反知事王公遂善額其門曰俠義可風

劉景濂字蓮溪監生光緒癸巳以軍功保五品藍翎縣丞分發山東升用知縣生平尙義疎財如修義渡修運河隄皆首先倡之親鄰婚葬窮乏無力者量予資助光緒庚子義和拳事起從

南皮縣志

卷九

文獻志三 善行

七十二

中保全善類尤夥

陳有聲字子駿同治甲子科武舉乙丑科挑取一等以衛守備咨部選用給予四品銜少孤事母至孝尤敦篤好義遇戚友家有所求輒慨然任之築城郭修公署捐納倉穀皆與有力焉有聲雖以武起家而言行舉止有儒者風卒年九十有二子楨邑增生孫二長漳次捷歷充師長旅長各軍職

孫廷善字濟仁從九品性端方見有逾閑蕩檢者則正言厲色以斥之必使其人遷善改過而後已當時村風一變無或故違廷善之戒而妄爲焉論者多之

張鶴齡字錫軒家殷實光緒庚子義和拳亂起井里騷動鶴齡散資財籌保障一方賴以無恙直隸總督因其辦理善後局奏

賞加五品頂戴

葛登墀字金階少稟異姿沈靜好讀書後輟學精岐黃兼善青鳥術樂善好施敦宗睦族嘗語人曰余旣不能以文章名世亦當精一業畧補缺陷其抱負如此晚年作葬親論一篇足以移風易俗尤爲膾炙人口登墀壽九十有六五世同堂一鄉推爲祭酒光緒乙亥遇覃恩賜七品冠服並賜齒德兼優匾額以旌人瑞子四孫十一曾孫二十以耕讀傳家

季崇勳字恕堂吉泰子太學生太醫院御醫兄弟數人皆宦遊獨崇勳家居功名淡泊不樂仕進而致力經史之學正直存心強恕行事常書一聯座右云色心言持身無二忍讓恕所寶者三至於處鄉里則厚德所及人皆感恩歲庚午六月運河決泊

南皮縣志

卷九

文獻志三 善行

七十四

鎮水至所居莊北護莊堰衝開閤莊惶恐無措崇勳督衆堵築往來酷暑烈日之中因勞成疾遂得失血症二載始愈偶讀佛經善書憬然有悟自此誓戒殺生且施藥濟人所全活者甚衆著有冷香齋雜文稿一卷又冷香齋筆記一卷其中多持身涉世之格言

尹元熙字子敬增廣生父東弼庠生教子綦嚴元熙承以婉愉不敢稍有怨懟與兄元承友于甚篤終身同居白首怡然元熙自幼刻苦勵學業師白巨卿誘掖最爲得力師沒邀同學立碑誌德而元熙始終其事一生課讀爲業成就甚夥親族就學者多不取束修異居從弟元愷自幼受業館他鄉亦令隨之時或供其膏火苦心啟迪卒使得入黌序中表某貧甚常常往來

其家元熙禮貌不少衰去必資助財物又有族人家無立錫地供其食用者數載絕無責報心也

戴官彤字弨伯問善子庠生七應鄉試高薦不售其爲人心慈而氣豪能救人之急光緒庚子拳匪起村人議設壇爐官彤識爲邪術恐其召禍勸阻百端既不聽乃束己之子弟杜門避之及事敗則兵卒之抄殺吏役之捕捉隳突叫囂合村鼎沸官彤復出而覆翼之維持之議及罰鍰並傾囊而助之卒使村中無一人囹圄者方拳匪盛時至戚劉與董避難其家匪徒疑爲教民欲害之官彤挺身調護卒賴以免其好義多類此著有聽鸛書室詩集

尹仲楷字式如幼失怙事祖父母及母以孝稱友于兄弟慷慨

南皮縣志

卷九

文獻志三 善行

七十五

好義每遇親鄰喪葬婚娶襄助一切措置裕如不憚其勞爲人排難解紛無不折服光緒三十四年值歲饑邑令孫公鴻烈聘辦平糶仲楷勤公務省公費出入會計纖微悉當孫公嘉之呈請獎給五品銜

姜世震字小東庠生處鄉里公明正直戚族鄰里有困厄者輒慷慨援助遠近有爭端必力爲調處雖充縣議會議員非公事未嘗一入公門其品行端方爲人欽佩

劉新卿字勵甫性忠誠以有益社會爲宗旨親友族鄰有所爭則苦口勸導或從中墊款以息其事村內數十年無訴訟者新卿力也其子炳岳在本村創辦學校十餘年來一切費用由己擔任人皆謂有乃父風云

張鎮堂性古樸耿介不與流俗合孝父母睦兄弟舉動必遵禮法無時或苟時聚族人子弟曉以忠信孝悌古貌苦口皆嚴憚之終其身無敢放蕩者蓋受其陶鑄者深矣親喪值大雨後靈柩就道跪拜泥塗間不少避子均立年五十餘病故爲具薄棺葬日命其孫負土成墓論者咸稱爲今之古人

張鍾秀字忠恕五品職銜貧而好讀繼學醫精眼科嘗懸壺市上有所羸羨悉合藥以施貧者有鄰人朱虎母死不能殮施給棺木鄉人稱之

吳忠甲字乘六邑庠生性剛直見無禮者正言責之雖觸其怒不恤也從弟殿甲遠遊不歸遺妻及周歲兒無力支持門戶忠甲隨時撫恤而呵護之卒使能自樹立業師副貢生徐光儀歿

南皮縣志

卷九

文獻志三 善行

七十六

忠甲釀金爲之立石以垂不朽設帳講學趨重實行不沾沾於帖括遇寒峻之士盡力獎拔不責束修年八十九無疾終

白志忱字謹堂方祺子讀書明大義篤于孝友與朋友處慷慨磊落肝膽照人性尤方嚴人有過輒切責之邨中游手美服之少年皆望而引避素精堪輿學而必推本心地藉以勸世云徐蘭如字升廷邑庠生平生見義勇爲曾建立徐氏宗祠卽於祠內設立家塾光緒間國家提倡興學蘭如與村人籌定經費首先立初級小學校爲各村之模範學生增至四五十人學風之盛至今爲南區各村冠縣公署贈以栽培後起匾額

周寶珍字興三號鑫三幼嗜讀早歲游庠入貢值新海防例開報捐縣丞分發江蘇署理鎮江府經歷奏保知縣加同知銜仍

留原省補用嗣調安徽辦理鳳臺淝河下蔡正陽關等處鹽釐繼調山西辦理廟吳平絳曲沃等處土藥統稅生平厚於待人在官時曾有所屬司事李某病故貧不能殮寶珍捐廉棺殮並助路費遣送回籍某年因公赴省行抵靈石聞有委員張某故於旅舍柩停數載不能歸寶珍邀該縣王令協助資斧飭差送回故里又嘗押解漕銀道出海上有浙江候補知縣黃某同舟失去公文要件倉皇無計勢欲投海寶珍向未謀面慨然就而慰之並代向輪船賬房交涉終將原物追回厥後丁外艱回籍守制於慈幃定省之餘修墓立碑修宗祠續族譜族鄰貧難自立者分別資助有時拮据不惜借貸以予之並設義學躬自授課貧民賴識字其疎財尚義類如此

南皮縣志

卷九

文獻志三 善行

七十七

中華民國

王致襄字惠臣直隸第二中學校畢業民國六年東區以距城路遠地勢又延袤學童求學極感困難擬組織高級小學校而難於籌款致襄以教員自任甘盡義務熱心支撐數年不懈成就學子甚夥由是第三校賴以成立均推爲學界首功云

白俊卿性慷慨在哈爾濱充工程師旋里見學風不振慨捐鉅金興辦本村初級小學校其他事亦類此人皆德之

侯叔瑩字琇如早歲失怙性孝友與異母弟同居數十年相好無尤睦族敦鄰輕財好施凡有親朋造廬識與不識無不竭誠款接遇地方危難事必極力維持費重貲不惜也邑六區公送扁額曰厚德可風後無疾而終

楊春亭字和軒性慷慨好施與鄰人楊福明家褊貧傭工自給及卒妻子無以爲生春亭慨然贈米粟無吝色民國九年歲饑鄉人多不能舉火春亭曰鄰人皆饑我何忍獨飽乃出積粟量爲資助粟盡乃止翌年歲豐受其施者咸備粟以償春亭辭不受

張炳綬字端甫攻苦好學終身不輟以教授終老生平喜善舉不辭勞怨民國九年畿輔大水爲災鬲津河流漲溢砥橋適當其衝橋基震動四孔圯焉及水落商旅往來日行泥淖中南北車馬不通者年餘鄉人屢擬重修輒以工程浩大中止炳綬目觸心動毅然以重修自任冒風雨犯寒暑奔走呼號到處勸募未嘗稍有倦容各村感其誠篤庀材鳩工四閱月而告竣又倡

南皮縣志

卷九

文獻志三 善行

七十八

建本村校舍五楹招集生徒延師教授兒童賴之

單芳芷字蘭芷太學生任衍聖公府隨朝伴官性純孝幼時祖父患痺動轉需人芳芷日夜侍側奉甘旨祖父口有所遺輒掇食之其處世最能忍鄰里橫逆之來常情所不能堪獨怡然而受若不知人世之有恩怨者精堪輿學貧富求無不應相地相宅純就其自然者爲之不強爲更動其生平境遇前因後亨判若天淵晚景子孫繞膝身體康強耄耋之年猶能燈下視蠅頭楷年九十六無疾終人皆以爲能忍之報云